

GOSPEL TANGKOU

(GOSPEL HERALD)

Issue No. 3

Volume: XXXVIII

JUNE – JULY: 2024



T. DAIJANG CHURCH BUILDING
Dedicated by BISHOP



DANGAPARA CHURCH BUILDING
Dedicated by BISHOP



Khengjanglhang Hattuum Lutna leh
Phuondohna by BISHOP



International Children's Day

KUM THUPI:

"PASIAN TOH ZAWHKHAWM" *(Gen 6: 9)*

Editor:
RT. REV. KHUP DO KHEN,
BISHOP

EDITORIAL BOARD:**Editor**

Rt. Rev. Khup Do Khen
Mobile: +919612388924
E-mail: khupdokhen@gmail.com

Managing Editor:

Pastor M. Kamneithang Zou
Mobile No: +918974609177
E-mail: pastormthangboizou@gmail.com

Contributing Editor:

1. Rev Dr. Hangminthang
Mob: +919612997858
2. Rev. Thangliankham
Mob: +919862830905
3. Rev T. Chinlunmang
Mob: +917630854610
4. Evan. Ginminlun Tawtah
(Youth Promotor)
5. Mr Jangkholen Mate
(Mission Promotor)
6. Nh. Nuamboi
(Women Promotor)
7. Divisional Superintendent teng

Design & Setting:

Upa Khuplajem Guite

Circulation Manager:

Pa Dongzakam
Mob: +919612198903
 Upa Tutzamung
Mob: +918731830436

CONTENTS

1. EDITORIAL	: 1
2. LORD SUPPER HILCHETNA	: 3
3. NUAZUIHNA	: 9
4. PASIAN TOH ZAWHKHAWM	: 13
5. YOUTH AND MEDIA	: 16
6. HA CHIN A KUM THUPI HILCHETNA	: 21
7. OCCASIONAL DAY INTERNATIONAL CHILDREN DAY	: 23
8. MISSION COLUMN	: 27
9. ELWA COLOUMN	: 30
10. MISSION COLUMN	: 29
11. LYF COLUMN	: 32
12. VONDEI SAULIM COLUMN	: 35
13. MELC INNSUNG THU	: 37

Life Member : ₹ 3000/-

Patron Member : ₹ 2000/-

Kum Khat lah man:

- i) Khut ah ₹ 200/-
- ii) Dah ah ₹ 250/-

.....
Article zousie Managing Editor leh Editor kung a pieh ding; ahilouleh, Email in
melcqrts@mail.com *leh WhatsApp tungtawn a zong piehthei ding ahi* A
lahman Circulation Manager kung a pieh ding ahi Tualeh Article kigel zou-
sie Editorte ngaidan ahikim suoh sih hi

Editorial laikung pan...

PASIAN TOH ZAWHKHAWM

Luke 9:23;14:27, Mak 8:34

Jesu'n leitung a ahing len lai in, athugen na ah tambang in agen hi.
"Tuachi'n Aman amaute zousie kungah, Mi koipou in ahing zui ut
uleh amaleh ama kingaisah lou in nichin in across puo in hing zui
heh" (Lk.9:23).

Tami mun a Jesu'n "across puo in hing zui heh" achi khu
in a etsahna tamlou gen vai.

- i) Jesu singkross thuohna leh hasatna topkhawh etsahna
ahi hi (1pet.2:21; 4:13).
- ii) Shina ahi hi. (Nasep.10:39).
- iii) Zumna, muolphouna leh zahlatna ahi. (Heb.12:2).
- iv) Simmawna, Eng houna etsahna ahi. (Mt.27:39).
- v) Nualna, mudana,huatna lim ahi. (1Pet.2:4).
- vi) Ei le ei kinielna,kihuatna, kimudana jong ahi
hi.(Mt.16:24).

Gingtu khat ihina zal a eite'n isinglamte kipuoh a Jesu
Khris nua izui chieng in, eima deina zousie inial ua
ipaimang sieng uh china ahi tahi (Lk.14:26-27). Tua
ahizieh in, simmawna leh enkouna chi li (nam 4) thuoh
ding a ithinkhua uh iki piekhieh ngam ding uh ahi.
Tamte thuoh ding a iki piekhieh ngap sih leh i Manggam
nasepna pen alawching lou ding sa ahi hi. Ki lawthaw
belampu ihi mai uhi.

*Hangsanna khu hamsatna leh zauhuoina ahing tun a zong zaulou kei a nna
septheina ahi- J. Oswal Sunder.*

1. Khelna-mawna ilungsim in nop asah, isep utte zousie Jesu singlamte tung a ikhailup sieng sitset ding, bangma idap phuol lou ding ahi (Rom.6; 8:13; Gal.2:20;6:14; Tita 2:12; 1Pet.2:11,21-24). A hin aihin laisie khelna-mawna toh ikidouzing ding uh china ahi mai hi.(Rom.6; 1Pet.4:1-2).
2. Mangpa lenggam manaw a peizing ihi pum un, Setan leh mielnuai a nasepna leh thuneina te toh kidou ihi zing uhi (2 Kor.10:4-5; 6:7; Eph.6:12; 1 Tim.6:12). Tam khu igalpa leh dawil giloute idouna uh ahi. (2 Kor.6:3-7, 11:23-29; 1 Pet.5:8-10). Tuaban ah, tanchinhoi, thutah-thuman lum leh a, Pasian thu summet bawlna zang, zuou thu asuohsah lamkaite, Upate, Pastorte, Evangelistte, idal na zieh un, eite'n gimna nempikoima theipi lou in ina thuoh thei leng uhi (Mt. 23:1-6; Gal.1:9; Philipi 1:15-17).
3. I umdan leh ikhoheidan, tualeh Hagau lam a hinkhuo izah dan toh kisai khovel miten ahing et chiengun, alung thahna uh kisuoh kha leng hi. Khovel mite neh bangbang nelou, adawn bangbang uh dawnlou, ama uh ham bangbang a ham nonlou ihi tahzieh un, ahing muda ding ua, ahing huot ding mong uh ahi hi. Tambangte khu anua izui i Mangpa ading a techi ipan na uh ahi hi (Johan 15:18-25;Heb.11:25-26).
4. Anua izui uh Jesu mabang in, tami leitung a um biehna sakhuo chituom tuom te apat simmawna leh bawlgentheina ithuoh ding mawng uh ahi hi. ❖❖

Angsung khuolna ahisihleh kipilsahna ahiei in bangma bawlsih unlen, hinanleh michihin lungsim a kingainiem tahin, mi dangte ama sanga hoizaw in ngaituo heh (phil. 2:3)

LORD SUPPER HILCHETNA

(Bible Study)

- Pastor M. Thangboi Zou

Thumapui: Amasan anai leh gamla um ahawmtho huoi mama tam i Tangkou simtu zousie i galdot zing uh ahing peikia bai ding i Mangpa Jesu Khrist mi ngai nou toh ka jahna chibai hing buhing e. Ei Evangelicalte adia Thugin (Doctrine) "**SACRAMENTS**" poimaw mama 2 i neite lah ua khat tam "*Mangpa Nitah Annsieng*" (Lord Supper) pen Bible Tang **1Kor. 11: 23-28** sung pansan in mawltah in study bawlvai chin ka hing kisa hi. Ahoipen leh achingpen ahituon sih ding a, nanleh Hattuom mite'n iphattuompi thei kha u'leh chia laibu tuomtuom pansan a ka hing kaikhawm ahia, achinglou avalseng aup leh Pasion leh simtu zousie kungah na ngaisiemna uh ka hing ngen hi.

Thei masat ding: Mangpa Nitah Ann sieng khu "*Mi piengthate ading bou akibawl ahia, piengtha nailoute ading hilou ahi. Pichin man leh kideisah man a zong moh neh thei ding hilou ahi*" chi khu ahi hi.

A umzieh leh a tup/ agennuom pen: Mangpa Nitah Annsieng toh kisai Korinth hattuom ten atheilou uh hilou un, athei un azulou zieh ua Sawltah Paul in ngaikho mama in Mangpa Jesu tahsa leh sisan toh kisai a tam thu agenchien tha hi. Mangpa Jesu'n tami Annsieng

apat ahidan nguntahin azilsah ahiban ah, ashina phuonzana ahiman in hattuomte'n ibawl zel ding ua ahing thupieh ahidan agenchieng mama hi. Bible siemte'n thupieh (ordinance) chi thumal khu Sacrament sang in deizaw uhi. Sacrament ichi chieng in suh siengthou ahiei biehma toh kisai a Pasion adia kikoituom genna, sillamandang leh sil kiphuolgu (magical and mystery) lampang koh khah hi.

Mangpa Jesu'n a nuazuite toh Peikan Kut nukhie pen

khu Mangpa Nitah Annsieng (Lord Supper) asuo sah hi (Mt. 26: 20-27, Mk. 14: 17-21, Lk. 22: 14-23, Jn. 13: 21-22 simbe in). Peikan Kut (Pawt. 12: 1-14) khu Egypt a hutkhietna thupi thei ngitngetna ahi. Belam sisan jal a shiding lai shi nonlou chia thei gigena a guolnop ahi (Pawt. 12: 23). Mangpa Nitah Annsieng zong Jesu Belamnou mikhielte ding a ahing shina thei ngitngetna ding a bawl ahi hi.

1. Mangpa a kipat ka mu (11: 23):

i) **Amu bangbang gensawn/hilsawn hi** (11: 23.a): Paul in Korinth hattuumte kung a athugen (Mangpa Annsieng thu) khu aphuotawm leh hoi asahdan thu gen hilou in, Pasian apat amu (receive) bangbang gensawn (delivered) ahidan genna ahi hi. Tami khu Paul a kipan ahi sih a, Mangpa Jesu khu akipatna (source/origin) ahizaw chi agenna ahi (cf. 11: 2, 15: 1-3). Mangpa Jesu matsah a aum zan in nuazuite lah ah Paul apang sih chi ithei hi (Mt. 26: 17-30, Mk. 14: 22-24, Lk. 22: 17-20 simbe in). Tua zieh in Sawltah Paul in "Mangpa

a kipat" achina in, "para" chi thumal zanglou in "apo" zang hizaw ding hi. Tuakhu ama kung a kimaitua a Mangpa Jesu'n agen hi sese lou in, kizilsahna peisawn Jesu'n athei siemsah china zong hithei ahi. Sil zousie akimudan (mode) pen hilou in akipatna (source/origin) khu poimaw gige hi (cf. Gal. 1: 12, 1Thess. 2: 13, 4: 1, 2Thess. 3: 6 simbe in).

ii) **Matsah a aum zan in** (11: 23.b): **Matsah** (Grik-Paredideto) khu (paredoka- passed on) aham bul (rootword) toh kibang ahi. Tamna Juda Iskariot in zuousan (denied) in Rom sepaite thadia apiekhietna ah (passed on/hand over) genkha hi. **Roberson leh Plummer** ten, "Pa Pasian in a Tapa apiekhietna leh Mangpa Jesu shi ding a a akipiekhietna zong genkha ahi" (cf. Isai 53: 6-12) achi hi. Mangpa Pasian in Jesu Khrist khu mikhielte tankhe dia ang kipekhietna khu sawtpi hita hi (Late 2: 7, 22: 1-23, Isai 52: 13-53: 12, Eph. 1: 3-14 simbe in). Tami genlawna ding in Thuhun Lui hun akipat "Peikan Annkuong" ana kipan in Paul in zong **Jesu Khrist**

Ka thugen miten a ngainuom ua, a hinna uh akikhel tuon sih leh a lawsam kahi- Robert Chalmers.

"Peikan Annkuong a kithat ding Belamnou" ahidan agen hi (1: 30, 5: 7, 6: 20, 7: 23 simbe in). Hinanleh amansahpa'n (Juda Iskariot) apiekhiet zan khu "Mangpa Nitah Annsieng kipat zan" zong ahing suo hi.

2. Mangpa thupieh ahi zieh (11: 24-25): **Sawltah Paul** in, "Mangpa Nitah Annsieng" (Lord Supper) manphatna (significance) chiengtah in agen hi. Tua zieh in Mangpa Jesu'n ashikuon thu vaihah dan a bawljel ding a ahing thupieh (ordinance) ahi. Mangpa Nitah Annsieng manphatnate ahileh:

a) Khrist thupieh thu manna ahi (11: 24.a): **Bawzel un** (Grik-Poieite) achina in Mangpa thupieh (ordinance) ahina dihtah ahing kilang khie hi. Tami khu Rapture tan a bawzel ding a thupieh ahi hi. Tamna "Bawzel" khu Bible siemte ngaidan leh Hattuomte zuidan kibang vawtlou ahi. Hattuom khenkhatin, "Mangpa Nitah Annsieng" panglou khu "biehna buching in pom theilou" uhi. Nasepte 2: 46 nan, "Hattuom masaten a inn lam nangawn uah zong Tanghou phalsuo in

kipahtah leh lungkim tahin a ann uh anezel uhi" chin agen hi. **Nasepte 20: 7** nan, "Troas khuo a Hattuomten nipikal ni masapen in Mangpa Nitah Annsieng alui uhi" chi akimu hi. Hinanleh Bible in ahun (time) ding pen genlou hi. Apoimaw pen khu "bawzel" ahia, tami khu Mangpa Jesu thupieh manna/ zuina ahi hi.

b) Khrist tatna thei gigena ahi (11: 24.b-25): **Thei gige/ theizing** (Grik- Anamnesin): Tamin agetnuom pen ahileh, "Mangpa Nitah Annsieng im apoimaw na khu Jesu Khrist tatna manpha ahidan thei gige/ theizingna suhlatna ahi" (Lk. 22: 19 cf. Heb. 10: 3). Mangpa Jesu tatna nasep nounel thei tawp a lakhietna khu "Tanghou leh Uain" toh kisai hilchetna hi chin Mangpa'n agen hi.

c) Tami route a ding a kiphalsuo ka tahsa ahi (11: 24): **Kiphalsuo** (Grik-Eklasen): Thuhun Tha laibu ah tam thumal khu 14vei akizangte lah ah 11vei Tanghou kiphalsuo genna in akizang hi (10: 16, Mt. 14: 19, 15: 36, 26: 26, Mk. 8: 6,10, 14: 22, Lk. 22: 19, 24: 30, Nasep. 27: 35 simbe in).

Thumna ichi lungtang tah a ngetna hilou in, gal a kihoupina bang ahileh, dawn in aum ngaisih ding hi- Oscar Wilde.

Mangpa Jesu'n eite dia atahsa vuo-le-sat a aum ding etsahna in Tanghou aphalsuo hi (Isai 53: 3-6).

d) **Khrist sisan a Thuhun Tha** (11: 25): **Nou** (Grikk-Poterion). Tanghou aphalsuo toh kibang in (similarly) Nou (Cup) inzong Khrist tatna leh asisan zang a Thuhun Tha gen hi. Thuhun Tha laibu ah 13vei kizangte lah ah 10vei in Jesu'n "Hamsatna palding ahidan" genna in akizang hi (Mt. 20: 22-23, 26: 39, Mk. 10: 38-39, 14: 36, Lk. 22: 42, Jn. 18: 11, Kil. 14: 10, 16: 19 simbe in). **Gendan dang khat** in genlei, "Thuhun Tha suhkip ding a hing luongkhie Khrist sisan tanga a kizang ahi hi", chin akigen hi.

Thuhun Tha (Grik-Kaine diatheke): Thuhun masa zousie in buchinlouna nei ahi zieh in Thuhun Tha ngai ahi (Jer. 31: 31-34). Jesu Khrist a palai, akithoina ahiman in asisan in tam thuhun anamkip hi (Heb. 9: 15, 10: 1-4, 12: 24 simbe in). Jesu Khrist sisan vang in ikhelinate ngaidam aum in Pasion mite setden ding a suh siengthou in aum hi. Thuhun Tha dang

umkia nonlou ding ahiman in tam Thuhun Tha in tangtawn dai tading hi (Mt. 26: 28, Heb. 9: 19-22, 10: 16-18, 13: 20 simbe in).

3. Khrist hing peikia ding phuonzana ahi (11: 26.a): **Hing peikia** (Grik-Elthe): A hing peikia chi guo hilou in, ahing peikia matan (achri ohu-until) chi toh ahing kizatkhawm zieh in Mangpa Jesu a misiengthoute ladia hing peikia ding ahidan, agenna ahi (15: 35, Mk. 10: 30, 11: 10, Lk. 18: 30, Jn. 5: 25 simbe in). Tam hun chieng in "Tanghou leh Uain zang a Mangpa Nitah Annsieng luina abeita ding hi". Tua zieh in tam "Annsieng imten/ neten Mangpa Jesu hing peikia ding ahi" chi iphuonkhietna uh ahi hi.

a) **Khrist shina phuonzana ahi** (11: 26.b): **Phuongza** (Grik-Tatangellete): Tamin agetnuom ahileh, "Mangpa Nitah Annsieng i imkhawm chieng in Jesu shina phuongza ihi uhi" (9: 14, Nasep. 13: 38, 16: 17 simbe in) chi theizing vai. Tua zieh in tam Annsieng khu thangbawl ding hinglou in sunglam a Jesu Khrist tatna gingtate'n polam mite'n (piengthalou ten) zong

Laibu hoi khu lawm lah a lawm hoipen ahia, tuni leh tangtawn in a ngeingei ahi- Martin Tupper.

ka ginna (faith) hing theipi u'leh chi aphuonkhietna zong ahi. Tua zieh in mi piengthate bou in tam Annsieng a im ding uh ahi, aziehpén Jesu shina phuongkhietna Annsieng ahiman in.

4. Mi ama leh ama ki-enchien zaw heh (11: 28): **Ki-enchien** (Grik-Dokimazeto): Tami'n agetnuom ahileh, "na tatdan leh na dindan/ hindan thei sawm a na ki-etchetna ding" agenna ahi hi. Tulai gingu kahi kichi khen khatte'n, "amau hinkhuo zatdan ki-enchienlou un, midangte hinkhuo zat en un, asoysel uhi" nanleh Bible in agetnuom pen ahileh, "Nang ma na ki-etchien in" achina hizaw ahi. **Thiselton** in, "Mangpa Jesu tahsa leh sisan in mimal hutdamna leh midangte toh kizopna toh kisai a atheisiendan uh, a lungput leh anasepte uh a tahtah ahinaimah chia kivel ding, genna ahi" achi hi.

11: 28 nan, "mi ama leh ama ki-enchien zaw heh, tuachin Tanghou khu ne henlen Nou khu dawn heh" chin agen hi. Tua zieh in, "Eima Pasian masang a ki-etchet apoimaw mama hi,

aziehpén, na thu a siem tang ding na hia, na thuma a siemmaw tang ding nahi" chin Bible in agen hi.

Koi teng in a nethei ding e?

Sil zousie in hoina leh hoilouna anei bang in, Mangpa Ann sieng toh kisai in zong mi zousie in neh theilou ahidan achieng mama hi. Tua ahileh koi tengin a neh thei diei? ichileh:

i) Mi piengtha ten, Pa, Tapa leh Hagau Siengthou min a Baptisma tang ten tami aneh thei giep ding hi (Nasepte 2: 41-42).

ii) Piengtha jou a, Baptisma tang a, hattuom khat a member hinuom ten tam aneh teitei dingun, tualeh hinkhuo siengthou tah a zangten a neh thei ding uhi (1Kor. 11: 29-31).

Koi ten a neh theilou ding e?

Gingu chietchiet hilei zong a hagaumi deu um chidan deu in, gingu sung ah zong tam Mangpa Nitah Ann neh theilou ding mi um ahidan ithei khietna dingun, anoi ah ensuh vai, koi ten tami aneh theilou ding e?

i) Mipiengtha lou ten (A min

Mipil, mi tung a a lennuom leh, mite nuoi a akingiemkhiet a, lamkai a apan nuom leh, mi nung azui ut ding, tuabang mite mitung ah a um chieng in zong mite'n gih salou hi- Leo Thue.

Khristian nanleh pienthana dihtah neilou- Hattuom member khat lah hingal) aneh thei sih ding uhi, aziehpén tami khu piengthate bou in aneh ding ua thupieh ahi hi.

ii) Piengtha hinanleh Tuiphumna (Baptisma) atan nai sih leh aneh thei sih ding hi. Aziehpén Tui-leh Hagau a piengtha te bou ading ahi (Jn. 3: 5).

iii) Piengtha hita, Tuiphumna zong tangta, hinanleh khelna sal a tang den nalaiten aneh thei sih ding uhi (1Kor. 11: 29-32).

iv) MELC Dan in Dan polam a umte (nuosua/ etkhiet a umten), tualeh Kum ching nailou Kum 15 nuoilam ten zong aneh thei sih ding chin (**MELC Kipuihuoina Bu Khil-5, 2, c & d**) agen hi.

Akhupsitna: Gingtute adia "Mangpa Niath Annsieng ngainep guol ahilou dan" na thei chieng tai mah? Tam Annsieng khu Piengthaloute ading hilou in, piengthasahte annsieng ahizaw hi. Aziehpén Annsieng khu Jesu eite dia athuohna

leh ahing shina phuonzana/theizingna ahi hi.

Piengthalou a Mangpa Nitah Annsieng neh khu amanphatna umlou ahi, tua zieh in Piengtha sahte (nuazui 12te) kungah Jesu'n "Keima nang theizing na ding un neh un" achi hi.

LAIBU ETTE (Bibliography):

i) Charles C. Ryrie, *Basic Theology*, 1999.

ii) Donald C. Stamp, *Hilhcianna Kithuah Lai Siangtho: Myanmar-Teddim Chin*, 1977.

iii) Don Fleming, *Bible Knowledge Dictionary*, 1990.

iv) MELC Kipuihuoina Bu, 2018.

v) Pastor Dongza Thawng, *Korinth mite Kunga Laihah Khatna, Bung 9-16 Hilchetna*, 2022.

vi) Rev Ginmawsawm, *Korinth laihah khatna Hilchetna*, 2011.

vii) Rev. V. Hangminthang, *Korinth laihah khatna Hilchetna*, 2011.

viii) Rev. Robertson Archibald, Rt. and Rev. Alfred Plummer, *A Critical and Exegetical Commentary on the First Epistle of St. Paul to the Corinthian*, 1961. ❖❖

Solna leh za-etna mi bangza ahiei ten atua ua, mi thaseten solna zousie atua hi- Spurgeon.

NUAZUIHINA

(Discipleship)

- Rev Ph Nangkhanlal, *Biel Pastor LWD*

Amasa in tam a tung a thulu "Nuazuihina/ Nuazuimihina" (Discipleship) chi gelthei ding a hunlem, hunpha damna hing musah a, hing petu i bieh uh Pasian hundampa Jesu Khrist min phat in umta hen.

Nuazuimi (Disciplshp) kichi mipi lamkai, zilsah, sinsah hiltthei khat (public instruction) a nua tuaminu/ mipa zui china ahi. Party khat sung a lamkaipa nuanua zui a, aneh neh, adawn dawn, pei peina, a tuntun na tung, anua ahi hina zousie a zui koikoi china ahi.

1. KHOVEL/ SIMLEI VAI AH:

India contact in gen talei, i tenna gam (India) kivaihawmna ah vaihawmtu lamkai BJP Party leader (tulaitah a) Shri Narendra Modi PM itheisa uh ahi. BJP tup leh ngimte zong gengen ngailou ithei chietsah uh ahi. Kolte sakhuo (Hindusm) hichiet ding, Bawng (Cow) thalou ding, sakhuo dang ahitheitan a India gamsung a upsah lou ding ahi. Tuamite suh piching a bohzui ding in BJP party

phutkhetu Jana Sangh ahi a, President masapen khu Atal Bihari Vajpaayee (kum 1980) ahi. Tualeh RSS lamkai masapen khu Dr Kishav Barliram ahi. Kum 1925 in ahi a, amun Nagpur, Maharashtra ahi. Tualeh BJP sung ah RSS achi uh Rashtriya Swayamsevak Sangh te khu a zietlang khut/ Baan ahi ua, amaute a khutzat uhi. Amau ukhu Hindu sakhuo zuite adia Paramilitary volunteer ahisih leh allegely militant organization ahi uhi.

I tenna Manipur state sung zong India phuolpi a kingah ahina toh BJP party vaihawmna azuingai ahi a, CM in phualpi peidan/ deidan maipha sui in Arambai Tengolte, Meitei Leepunte hing zang in tamtan itung uh, idinmun uh ahi.

Mihingte I theinate uh kibelas semsem leh, I pilna uh kiem hi- **Dr. Christopher Sun**

2. SOLKAR KIVAIHAWMNA/

POLITICAL: India contact in, M.P. member of Parliament khu India kivaihawmna Committee sangpen Lok Sabha Wikipedia ahia, angai thupipen u'khu, gam sung a sum-le-pai zahdan (revenue) muna ding, zahna ding lam ahi deu hi. Party ahahat penpen in gamsung avaihawm ahi zieh in kitu uhi. Tukum (2024) zong M.P. kitel hun ahi, koi party zuiding chi ahita hi.

3. LAISIENGTHOU SUNGA NUAZUI HIDANTE:

i) Laigielmi (scribe) khat in Jesu kungah, "*Syepa na peina tengah hing zui vang*" achi hi. Jesu'n akung ah, "*Si-alten kuo anei ua, tungleeng vate'n bu anei uhi, hinanleh Mihing Tapa in vang alu ngahna ding mun anei sih hi*" (Mt. 8: 19-20) achi hi.

Mangpa Jesu'n anuazui ding mi ahan a, bang ding a tam laigelpa, "*hing zui vang*" chi a, hing zuiin, Jesu'n achi lou adiei?

a) Amapa laigielmi (scribe) ahina toh ka thugendan ka gamtatdan leh ka nasepdan zousie abawn in giel (record) van in Judate, Siempu liente

Dansiem syete, Pharisaite kungah ahi lou lamlam in heh khathei ding hi. I tenna i dinmun toh te khinlei Meitei ten itung ua, agamatatna zousie uh eilam bawl, eipat, ei buk chiin zuou zuou in News/Media a phuongza uhi.

b) Amapa khu laigielmi ahina toh ama min thanna ding suiin laibu kisiem khah thei ding hi chi a, Jesu a din minsiet theina thaang kikam hikha a, pangthei ahi.

c) Jesu nuazui hileh ne leh dawn a buoibuoi ngai nonlou ding in ane neh, adawn dawn a tun tun na, agieh gieh na kihi ding in dei bangtah a laigiel thei ding chi tupna hikha thei hi.

Tuin eiten Jesu nua izuidan uh izuipa Jesu'n bang chi in angai diei? Tun ei zong Jesu nua izuidan uh eima gilpi ding, eima hamphatna ding meimei a zui ihikha ding uh ki-enpha va ui.

ii) Anuazuite lah a mikhat in, Jesu kungah, "*Mangpa va pei vangin ka pa vavui masa tavang*" achi hi. Hinanleh Jesu'n akungah, "*Hing zuiin mishi in a mishi uh kivui uheh*" (Mt. 8: 21-22) achi hi.

Kiten ma a kiphat leh kipatawi ahoi a, kiten nua chieng in tuate khu aloutheilou a akipatawi ding ahi- Dorothy Dex

a) Jesu nauzui khu akhatna in koilou, a innsung a ding thupi ngaizaw, innten louten ding poimaw ngaizaw hi. Ta leh nau kep ding pichin sah a alien alal, officer a pansah na ding kibuoipi zaw hi. Jesu Khrist nauzui sanga, a innsung (family) lam ngaisah zaw tampa bang kihi kha kitam kha thei hi.

b) Mishi a/ innsung mi shi a, umkhalou ding khongaizaw hi. Ka nu, ka pa mumanlou in um khavang chi hikha thei hi.

c) Jesu'n gamdang state dang gamla lam a zin sawm a, tua anuazuipa innsung damlouna um hitei ding a, ka umlou kal in ka pa ana shi kha taleh kei umlou ding chia kingen hi ding hi.

d) Jesu'n, "Mi koipou ka kunga hing peiin, apa, anu, azi, atate, asangampa, asanggamnu tualeh ama hinna nangawn ahuot sihleh ka nuazui ahi thei sih ding hi" (Luk 14: 26) achi hi.

iii) Tualeh midang khatin Jesu kungah, "Mangpa ka hing zui ding, hinanleh ka inn a mite mangpha ka va hah masa phot ding hi" achi hi. Jesu'n akungah, "Mi koipou loukaina langkawn

akhut a tukawm a nualam en khu, Pasion gam mi hitaah ahi sih" (Lun 9: 61-62) achi hi.

a) Innlam / khomite toh guolnop ki mangpha hah na bawl nuom tahtah hilou zaw thei hi.

b) Pasion nna zong sem ding leitung nna zong sem ding ahun amun dung zui a ki adjust ding chi khu tamna Jesu nuazui pa hina leh tulai ei Khristian hina toh kibang sah ing. Jesu nuazui kawm kawm a, leitung innsung lam zong lunggul a en kitam hi.

c) Sawltah Paul in, "Demas in tulai leitung a it mama zieh in Kei ang taisanta a, Thessolonika khuo ah apeita hi" (2 Thess. 4: 10).

d) Tulai igam ua Jesu Khrist theimaw kipang pumpum a Kani lei hou (Poppy cultivate), LCC, Upa ut nonlou, azieh Hattuom Upa kikai leh Kani lei haw pen zumhuoita ding hi chi atamta hi. Tuazieh in, nuazui hinkhuo Sangin eima khosah na ding poimaw ngaizaw tahi. I kam un Mangpa Mangpa i chi uhi. Hinanleh Mangpa Jesu'n, "... Mangpa Mangpa hing chi zousie, Vangam a lut sih ding hi.

Na kithuo khawmpi zousie kei sanga ahoizawna nei ahi chi ka thei a, amau apau ka zilkhe zel hi- Emanson.

Van a Ka Pa deilam bawlte bou khu alut ding..." chi (Mt. 7: 21). Mangpa Pasion deidan tah in i gamta in igamta un, anua i zuitah tah na uai?

AKHUPSITNA: Jesu'n, mipite leh nuazuite ahan a, akung uah, mi koipou in ahing zui uleh ama gimthuoh khosahlou in, a Kross pua in hing zui heh (Mak 8: 34). MELC zong Kum 70 tukum a ching ding ahi tahi. Tua ahileh, MELC Pasion hattuom mite i Mangpa Jesu in, "Ka nuazui na hina uhi" ahing chi na diei? Tam leitung idamsung un koi nua izui pen diei? Bui kuo tou tou a apha ding kuon a tawp ihi kha diei? Anukhiete masa ding, amasate nukhie ding kichi ah heipen ah ipang diei?

Anukhiete khu **Etsahna'n:** Kangrai Tripura te khu anukhie ahi ua, Bible a Jesu gen dan hileh amasa pang ding hilou ding e? I Mangpa Jesu nuazuina khu lungkelou a atawptan zui a, muolsuoh angai hi. **Sawltah Paul** in, Korinth mite kungah, "Ginna ah na um uoi mah nouma leh nouma ki enchien unlen, kithei chien un" (2Kor. 13: 5) ana chi khu ei zong ginna ah ium zing na uai?

Tuni'n koi nuazui ihiei ki enchien chiet vai. Jesu nuazui sanga MLA nuazui ihi kha ding uh. Jesu nuazui sanga Kani bawl, a sum law a um ihi kha ding uh. Jesu nuazui sanga sildang danga kipum pieh, Nam lamkai, Pawlpi lamkai, Organization lamkai, Philanthropy lamkai, gam lamkai, khosung lamkai etc a iki tulut (involve) itam zaw kha thei hi.

Ka gen utpen tam atung ate asie/ahoisih chi pongsan hilou in, a khatna ah Gingtu dihtah Jesu Khrist nuazui kahi iki chi uleh Pasion thu ma apoimaw pen amasapen (first priority) ah koi chiet va ui. Mangpa Jesu'n a nuazui ding adeidan tah ana gen hi, enzong athumangin zui chiet va ui (Jn. 8: 31 sim in). Mihing hina zalin gelkhiel, gelval, gel chingla umthei tham ding hi, tuate mihing bukimlou akihi zieh in kithei siem in, Pasion thu toh kitualou banga gelkha umkhathe ahi man in, Mangpa Pasion in hing ngaidam taken. Pasion thu (topic) toh kitua a Tang 1 tang 2 igel kha umte simtu zousie a ding in Nuazuihina zui sem, hatzaw sem ding in Mangpa Jesu Khrist in hing umpi leh hing puizing taken. ❖❖

*Laibu khu limgel siemna, lungsim hina, damsung hinkhuo leh akhenlam a bei mailou dia sathaunu leh manpha ahi- **John Milton***

PASIAN TOH ZAWHKHAWM

- By Evan. Thangkhanpiang, LED

Mangpa Pasion hoinate tang zel in tam leitung shi theina, lungkhamna kawmkal ah i um lai un Pasion hepina leh khotuana te tang touzel in, "Pasion toh zawhkhawm" chi thupi pansan a houlim khawmthei nalai dia, hun hoi hun manpha hing pia Mangpa Pasion min i phat masa uhi.

Laisienghou Tangtel: "Noah leh ahalesuon ten Mangpa mitmu in hepina anga a, Pasion toh zawhkhawm hi" (Siem. 6: 8-9).

Unaute aw, tami'n nang leh ke'n Mangpa mitmu in hepina i nga theina ding leh a Ama toh i zawhkhawm theina ding in a masa in tahsa pumpi leh i lungsim a sienthou ngai a, tualeh ihoi bukim ngai hi. Tuazieh in Pasion toh zawhkhawm theina ding in tam anuoi a pointte tamlou igen ding uhi.

PASIAN TOH ZAWHKHAWM NA Ding in SIENTHOU NA APOIMAW HI: Pasion toh zawhkhawm theina ding in a masa in eima mimal sienthouna apoimaw masa hi. Sienthouna ichi chieng in inei sil, ipuonsilte ahi sih a, i lungsim a sienthou masa ngai ahi. **Heb. 12: 14** na i et leh "Mi zousie toh kilemna leh sienthouna del un, tua siengthouna

louin koiman Mangpa amu sih ding hi", achi hi. Jesu Khrist nuazuite a ding in a masa in eima mimal sienthouna apoimaw masa pen hi. Eima mimal sienthouna louin koima Pasion toh zawhkhawm thei sih ding hi. Sienthouna ichi chieng in neh-le-dawn a sienthou, gamtat khohei a sienthouna, tualeh numei-le-pasal a siengthouna, achite ahi.

1Pet. 1: 16 na in, "Aziehpen noute siengthou un, Kei ka siengthou hi" Mangpa Jesu'n achi ma bang in i siengthou ding uh ahi. I siengthou joulou zieh ua, Pasion mitmu a hepina ngazou lou a, Ama toh zawhkhawm theilou ihi uhi. Tuazieh in Unaute aw, Pasion mitmu a hepina inga theina ding in ki suhsienghou in pan latha

Pasion panglou a hinkhuo zat khu khawl a khau umlou a puonkhui bang ahia, pentui umlou a laigel bang ahi hi- William D. Mounce

va-ui ichi uhi. Noah hunlai in leitung mihingte gitlouna leh gamtatnate ahuoisiet zieh in Pasion thangpaina hing tung in abawl sa hinna nei zousie a suhmang laiin Noah ana siengthou a Pasion mitmu in hepina ama leh a ha-le-suante tung ah, ana tung hi. Tuama bang in, unaute aw, tuni in ikhelnate ki suhsienghou in Ama lam zuon lei Ama mitmu in ei leh iha-le-suanten Pasion hepina imu ding ua, Pasion toh i zawhkhawm thei ding uhi.

PASIAN TOH ZAWHKHAWM NA Ding in KHOVEL HINDAN A UMLOU DING AHI:

Mi tampi tam leitung nopsanate suiin eima utna chiet ah ipiel mangsieng ta ua, khen khatten nopsa nading ahi phot leh chi in Pasion deilou lam lam semin i um ua, tuazieh in Pasion thangpaina Noah hunlai bang in ahing tung ta a, Khristiante lah ah, Ki-itnate, ki hepinate um nonlou in Jesu nuazui ihi lam uh zong kithei nonlou in leitung hindan toh kitua in i um siengta uhi.

Rom 12: 2 nan, "Tam leitung hindan toh kitua in um sih un Pasion deilam pomtah leh hoi

bukim bang ahiei chi na theina dingun na lungsim uh a tha a um in hing lamdang zoh ta un" ana chi hi. Ei Khristiante Pasion deilam a kilamdanna nei ngai ahia, i ni danglai hindante uh paikhiet ngai ahi. Kilamdanna ineilou a leitung hindan ah ium laisie Pasion toh i zawhkhawm thei sih ding a, i Khristian himan zong umlou ding ahia, tuaban ah Pasion mitmu in hepina zong inga zou sih ding uhi. Ei leh i ha-le-suante tung ah, Ama mitmu a hepina inga theina ding in khovel a, hoilou zousie taisan thei chiet ding in leh Ama deilam zuithei chiet ding in panla tha chiet va ui.

PASIAN TOH ZAWHKHAWM NA Ding in LUNGSIM PIANGAI AHI:

Tam leitung itenna ah mi tampite, a hausa un, tuaban ah anei zoulou, a neh zoulou zong um in hinanleh Pasion in Ama lim-le-mel sun a ang siem dung zuiin i lungkim chiet uhi.

John 3: 16 nan, "Mangpa Pasion in khovel a it seng seng zia in nang leh kei shi tangin a Tapa tang khat neisun ahing pieh hi" chin agen hi. Unaute aw, tuni'n Ama siemsa leh

Pasion khu Sepai battalion tamte lam ah a pang sih a, galdou siempente lam ah apang zaw hi-Voltaire

Ama nuazui ihi ua, Ama toh i zawhkhawm theina ding in ilungsim ipia uh ngai ahi. Laisiengthou in anagen bang in, Aman khovel a it seng seng zieh in a Tapa neisun ang pieh hi, chi imu uhi. Mi tampiten Pasion guolzawlna i dong ua, hinanleh Pasion hing pialam zong theilou in Ama deilou lamlam ah iki hei ua, Ama thangpaina itenna leitung ah

ahing tung tahi.

Siem. 22: 12, "Abraham in a tapa neisun Pasion a ding in ana pie hi." Khuzieh in unaute ihausatnate uh, ipilnate uh Pasion in a dei sih a, asia apha itheina ang piesa nang leh kei lungsim a dei hi. Khuzieh in Pasion toh zawhkhawm theina ding in i lungsim pethei chiet ding in hattuom mi siengthoute atha in ikingen uhi. ❖❖

PASIAN THU NA AWI LEH AMA DEILAM AMASA'N KOI IN

Mt. 6:33 nan, "Pasion gam leh adihtatna sui masa un, tuachi'n tam silte zousie piehbe na hi ding hi" chin agen hi.

Khat vei sap nungah khat in Dawr a van a etleh puona tungsil adeilam tah khat amu kha hi. Tuami alei ut a, nanleh hamsatna khat ahing um hi. Tua puona adeipen lei leh sawm-a-khat (Tithe) pe theilou diing, alei lou leh apia thei diing ahia, tuachin a sum neite ahing hisap tahi. Tuachia abuai mama a, hun sawtpi aki ngaisun tahi. Tuachia hunsawtpi akingaituo sung in, sawm-a-khat pia zaw ding a ut mama a, puona khu leilou maidin thutanna ahing siem khe tamai hi.

Tuachin Puona juote (Dawr neipa/nu) kunga tam a deipen sang a man ngiemzaw pen leidin athu hah tahi, adeipen leina diing a asum akichinta lou zieh in. Tuazieh in, puona juohten athu hahpen (puohna khu) ana neinon tahsih uhi (khawng/ jua manta), tua adeipen ma ana um hi. Numeinu'n athuhah lou pen khu a thot ta uhi.

Sawm-a-khat pelou jen in tua puona adeipen thuhah taleh, akhonung a aman (price) adit a ngai diing a, ama ading in a hamsa zaw diing hi. Tuami'n aphattuomna zong umlou diing ahi. Tamna nungahnu bang in, Pasion adiing masa sah poulei ei ading Pasion in hing ngaituosa mama diing hi. Tuazieh in, Laisiengthou gen bang in a gam leh adihtatna sui masa vai.

- Pastor M. Thangboi Zou

YOUTH AND MEDIA

- Pro Pastor Langzungthang @ Thangboi

Khovel media khangtouna khang a kiding! Tulai khovel khangtouna gang mama in, sil zousie internet thaneina leh silbawltheina toh nna kistem in internet khang a kidingta hi. Tuaten media nasepna lam suhhat mama in, tuazieh in media lampang gensawm ihi. Ahileh media ichi bang ahiei? chi neukhat genvai. Media ichi khu athei bailam na ding in, "khotang khat, ahilou leh mite thu kijatuohna, kijasahna, piesawwna lampite khu media" chi mei ding ahi. Media khu tampi aum a; tuate khu akitattho (printed) meida: Newspaper, books magazines, etc. Electronic/ broadcasting media: Television, radio, cinema, etc.

Digital media: Internet, mobile phones, social media, etc. um hi. Nanleh tuate va bulsut sawm ihi sih a, tukhang a khanglaiten bangchin zang lei phattuumna ahing tun diei chi igen ut ahizaw hi.

Khovel khu siemzilna lam zousie a khangtouna sang mama in, adieh in technology leh internet thaneina ten phattuumna leh sietna tampi hing tun hi. **Etsahnan** AI (*artificial intelligence*) nasepna tungtawn in Na smartphone a na mel na puom (face recognition) thei theina bang um a, Robot mihingte nasem sah ding a

kizang, leh Chatgpt app vel bang um hi. Chatgpt bang etsahnan; topic nadei khat giel lehcin AI in na sil giel toh kisai hing zongin seconds 2,3 vel in dawnna hingpieh ding hi. Hibang khovel siemna leh vanjat mediate bangchin phattuumna in I zangthei diei chi tomkim in genvai.

Media ichi igensa bang in lam tampi um a, nanleh niteng a izat social media lamte en in, a phattuumna leh siettheina lampite ensuh vai.

Media ahoina jattheina ding lampite: Van juahna leh ahoinate lahna (*Adertizing and*

selling products)

Tulai hi social media ichi youtube, Facebook, Instagram, Tiktok, Twitter, Snapchat, WhatsApp, etc. tungtawn in businessmen, marketers, entrepreneurs ten avan bawlkhiet (products) te ahoidan lahkhetna (advertise) platform in jang ua, phattuampi in khangtoupma ma uhi. Amauten products leh services te photos, videos leh a thu tungtawn in mite deithe ding in social media te zang uhi. Thamlou in, offer leh discount bawl in a company leh a brandte uh promote bawl uhi. Tualeh van leimi (buyers/customers) ten zong social sites leh online tungtawn in brands leh product items adeibang leh athei ngailoute thei in kimantah in van bailamtah in zong/lei (shopping) thei un, phattuomna lampi hing suoh hi.

Sum-le-pai lamna jahthei (*Income generate*): Atung a media tuomtuom igente adieh in youtube, blogging & publishing network, digital marketing, Linked, etc. te tungtawn in laigel siem miten topic based, articles, ngaidan (ideas, thoughts) gielin

sum mutheina lampi hoitah suosah hi. Live gaming, tutorial videos, entertainment videos leh adang tampi um hi. Etsahnan youtube videos upload na bawl a tua khu views tampi na mu leh sum mu na suoh hi. Tuazieh in hi social sites te zangin sum-le-pai munna in na mang thei hi.

Siemzilna munpi (*Learnig based platform*): Siemzilna lam ah zong ahoina tampi um hi. Hite social media sites apat news ahiei, lekha toh kisai materials tuomtuom books, magazines te a soft copy muthei ding in um hi. Online class teaching videos te, motivational videos tuomtuom sum a lei ngailou, athawn in muthei leh zat thei ahi. Google meet, Zoom te tungtawn in class bang nei thei hi a, thamlou in Company ten hi platform zangin training piehna leh work from home hite tungtawn in zang thei uhi. Khovel a digital nasepna in malam suon a, nasep bailam sah in, sum-le-pai senna ding tampi zong dawn jangkhai mama hi.

Kisuhhalna, hun awng jatna (*Entertainment Platform*): Mi tamtah a ding in achim hun chieng un zong sil tuomtuom

Mangpa Jesu zannin ashi a, tunin a thoukia a, zingchiah a hing pei ding hi-
Martin Luther.

te enin time pass na'n zatthei ahi. Hinanleh hite tungtawn in thupil, mite thu-le-la giel, motivational videos, true story, funny videos ahi zong in moral neitah sil tampi zilkhiet theiding um hi. Tamteng chou ahisih a, neukhat a phattuomna lampi um ahi chi neukhat itatlat na ahibou a, tampi gending um hi.

Media sietna khenkhatte: Social media te alangkhat a zong sietna tampi ana tun veve hi. Tam media in News, thu zuau zuau te gam meikang bang in kitheldal paisah in munchin, gamchin tung peisah ngal hi. Media lah a photos hoilou, kitha kimat leh ki bawlsietna videos, limte vel in etsahnan: ki rape na, gimneitah a kithana chite vel ki post, thu hoilou jatjat ki post in tuaten khanglaite leh mi tamtah hinkhuo leh lungel ahoilou lam in ana thuzaw thei hi.

TEDx a, **Ayush Rai** kichi pan a talk show ah agenna a, 77% khanglai Kum18-24 ten ahun awng neisun sun hun in a phone tham uh, tualeh zankim a khanloh hun in zong a phone tham uhi. UK bang a piching khat a khanglou minutes 5 zou

in phone tham ngal uhi. **Sean Parker** in

Facebook mission masa khu, "Bangchi mite hun atam theibang a lah mangpieh ding leh a pilvangtah a lunggulna neisah ding ahiei" chi ahia, tualeh "adengdel mite ngaisutna lungsim suhsiet ding" chi ahi talawm ahi asiltup uh! Hi media ten phattuom na huntahing tun vangin alangkhat a khanglaite lah a lunghimawna leh lungnemna, kingaisietna (anxiety, stress, depression) chite 70% in tungsah zou va-ia hi.

NBCNews in "US a kum 15 high school naupang 86% in smartphones toi un, kum 13-17 kikal ten social media zang uhi" chin *Sergeant general* khat in gen hi. 2021 kum in high school pasal 42% leh numei 57% ten social media te zieh in hinkhuo dahna leh kinepna neilou in hinkhuo neisah hi chi uhi. Thamlou 29% bang naupangte lungtang dammawna tut a, naupang 22% bang mani kitha (suicide) utna piengsah hi chi uhi. Azieh khu US bang vel a social media tungtawn in mite suhsietna, minsietsahna, huhamtah a kithana leh kibawlsietna ten

Mangpa shina in hing tuom nanleh, nak hut a ka um ni a kipan ka lungkim mama hi- John Calvin.

khanglaite hinkhuo tampi buaisah in sietna tampi ana tun veve hi.

Tukhang khu ah khanglaite Media hujap khangte ihi uhi:

Khovel namdang te akhang khang in khovel khangtouna toh ana khang khawm ua, ahin eite pen i Khristinity hina leh siemzilna lam ah khang tam pei nailou, thamlou in hi khovel khangtouna ten khang khat sungah thakhat in hing nawh khum hi.

Tuazieh in social media te kizang siemlou, phattuom na lam sangin sietna lam a hing hujap zaw bang hi. Khanglai tampi'n social media leh games chite vel a hun tampi suhmang in, lekha simna lam, sep-le-bawlina lam a zong mipha lahna hi guontu abang tahi. Tuaten mi tamtah kingaisietna thaang leh kinepna bei lunggel ngaituohna hing neisah in, kitha utna (suicide) hinkhuo bang tun ahiman in pilvang huoi kisam mama hi.

Media ichite zong bawltawm pulam kilahna meimei hithei hi:

Atah in genlei social media ichi Facebook, instagram, snapchat,

Tiktok, etc. te a mite nui singseng (smiling face) a ki post khat enghuai abat vang in, atah tahin alim, videos te a aumdan ana bang samlou hi. Lungkhamna lientah nei, asunglam kapkap, apulam a mite muhna ah ahoi a kilang utna meimei ana hithei hi. Khuzieh a media te khu sil atah tah sang a, mite eng ding deina a ki bawltawmna ana tam veve hi chilei ki khiel sinteh chi ing! Social media te a comments, likes, view tamtah namu ten kipahna tomkhat hingtun theina; ahin sot dailou in, bukim zou lou a, tuate tamtah namu zieh in zong nang mihoi dieh, mipha zou, ahilou leh na dinmun leh na hina (identity) tahtah pa akhel tuom sih hi. Khanglai tamtah ten tuate engin, thupi ngai ua, mite phalahna leh hoi zou lou kisah in thanem khazel uhi.

Nanleh tuabangte zousie zuau punlum leh adihlou ichina hi laizang lou hi. Kibawltom tam talua chi igen utna hizaw hi. Tua ahileh khanglai, tam nopsahna leh sietheina ding lampite apat na hinkhuo na zatsiem leh; miphana leh lawhchingna lampi

Pasian in mimawlte deepen ahi ding a, leitung ah mimawl abawl/siemhoi tampen hi- Abraham Lincoln.

leh vanzat hoitah hing siempieh tu hiding a, media hoina jal zou mivangpha na suoh ding hi.

Khanglai nang leh ken media te bangchi'n izang diei?: Khanglai Pasion zaulou in moh; tam khovel khangtouna ten sietna hingtun theina lampite apan naki kemching zou sih ding hi. Azieh ahileh ajawng pen in zong khovel a nopsahna ding lampi tuomtuom tam media leh internet te tungtawn in, niteng hun zat theina ding lampi nei hi. Ahin tua kipahnate sangin na hinkhuo khu khaatna leh natna piengsah zaw a, Setan vanzat tomkhat sung a lungnuomna meimei, atah hilou, asunglam a shina gu leh nang ding a thaang kikam ahizaw hi chi geldoh vai! khanglai nang leh kei kipahna pen Mangpa thute hizaw hen. A sun, a zan a Pasion hoina thute ngaituoh tuoh mite hivai (Late No.1). Tualeh ei gingtute ihina dihtah (true identity) khu tua atung a igente hilou in; lamdangtah leh zauhuoitah a siem (Late 139:14), Pasion deituom, amite ihi uhi chi manghil sihvai. Tualeh eitepen silhoi bawlding a siemtha aumte

ihi uhi (Ephesa 2:10). Khovel a hing ahin khovel tawndan juilou ding in i Laisiengthou in hing hil hi (Rom 12:2). Nanleh tam mediate tungtawn in Evangelism leh discipleship (Jesu nuazuina) in social media te zangvai in, Pasion hoina tangkoupi leh mite Jesu thutah leh hinna ahi lampi komutu in zangvai.

Thukhupsinna: Khovel a sil ni kitet (compete) gige a; hoina leh sietna ahi. Sil zousie hoina leh sietna anei a, ahin azangtu mimal, pawlpi, khotang leh gam leh minamte khut a kingah ahi. Khanglai nang tam khovel khangtouna, eite ading a zong phattuomna leh hingdawn jangkhai mama te sietna in na zang diei hoina in na mang diei? chi ki dohna khu nang sie-le-pha theina khut ah koi vai! Aziehpén tahsa lam a tu mi in, sietna a at ding a, hinanleh Hagau lam a tu mi in kumtawn hinna a at ding hi (Galati 6:8). Tuazieh in thu khensatna dih telthei ding in Mangpa'n pilna leh theisiemna lungtang dih hing guon taken, chi khu iki chielna thutawpna leh khupsinna hihen! ❖❖

HA CHIN A KUM THUPI HILCHETNA

Prepared by: Retd. Rev. Dr Hangminthang, Former Bishop, MELC

JUNE: *Pasian toh zawkhawm lamkai*

- i) Pasian toh zawkhawm lamkai te'n mawpuohna a langam uhi. 1Khangthute 21:16-17
- ii) Mipite khelna tung ah ngaidam a ngetpieh hi. Pawtdohna 32:10,32
- iii) Ama gensete a din ngaidam a ngetpieh hi. Kisim 12:4-14

HILCHETNA TOMKIM

1Kng21:16-17 sung ah: Kumpi David in Israel gamsunga miphaza sim diing a thu apieh a, asim sahna in Pasian a lungthah sah a, gamsungah Pasian lungthahna mipite tung ah atungta hi.

Khumbep in, David in Pasian kung a thupha tawi in a thum a, "*Mipite kisimna diing thupie keima hilou ka hiei mah ? A khiei leh silgilou bawl khu keima hilou ka hiei mah ? Hinanleh, tam belamte'n bang abawl khiei uoi ? Aw Mangpa Pasian, keima leh ka pa inkuonte tung ah na khut hazaw inlen; na mipite tung ah hipi (natna) leengsah nawnsin, chi'n ka hing ngen hi.*" achi hi.

David in, Leengpa/lamkai ahina ah thubuoi toh kisai in akihemang sih a; midangte angaw sih a, ama mama in mawpuohna ala-ngam a, athuoh ngam hi. Eite hilei, koi ama khat ngaw maithei ikhu maw.....! **Pawtdohna 32:10,32** sung ah: Israelte helhat zieh in Pasian a lungthah mama a, Mosi kungah, Tam helhat namte sumangthai vangin, nangma akipat nam siengthou khat tungding vang, achi lai in, Mosi ana ut naisai sih a, Pasian ale-henep

Lam-etna neukhat zong nei nonsing! Na chi laitahin Jesu'n eite hing lam-et nalai hi- John Wright Follettee.

zawsop hi. Tuachin, **Mosi in Mangpa** kungah: “*Tam mite a khelna uh na ngaidam thei nadiei ? Na ngaidam theisih diing leh, ka hing ngen ahi, na laibu sunga na gelsa apat hepi tah in hing thaimang mai in*” achi hi.

Eite kung ah, Pasion in ei apat nam tha khat bawldoh diingin hing gen mawngmawng leh koi ahie a utlou diing ? I kinaah pah diingdan uh kigen theisih..... Mosi khu ut le malah in, Pasion min khumna laibu apat amin thaimang dia ngenzaw mawh hi. Thupi maw ! Eite lungtang (attitude) zong Mosi a bang ahidiing poimaw mama hi.

Lamkai I ut ua, ilungsimte ulah aneu a neu, atom a tom thei. Eima meetna diing leh thuneina diing maimai ingaituo uhi. Mosi in ama angma khuollou a, amite a it tahtah zieh in, “*Leitung a mi nunnempen*” hina (title) atang hi (the meekest person in the world). Eite’n ilamkaina uah bang title itang (mite’n ahing pia) uai ?

JULY: Pasion toh zawhkhawmna dia poimawte

- i) Hinkhaw siengthou. Heb. 12:14
- ii) Pasion a siengthou ahimabanga, eite zong siengthou diing a phuut ihi. Siempudan 11: 44-45; 19:2

THUPI HILCHETNA TOMKIM

Pasion in khelna buoh leh kidahhuoi lah akipat in, a Tapa Jesu Khrist sisan siengthou in ahing tandoh a, ahing susiengthou tahi. 1Pet. 1:19. Khum sisan a tatdoh leh sawpsieng a umte khu Pasion tate ihita uhi. Tuazieh in, Pasion toh izawhkhawm theina diing in, hinkhaw siengthou a poimaw hi. Hundam in umta nanlechin zong, na hinkhuo khu a sienthou loua, gin umna na neilou leh, Pasion toh na zawhkhawm theisih diing hi. Pasion toh zawhkhawmlou gingu hinkhuo khu, gingu guollel hinkhuo ahi.

Pasion in thahatna vang toh hilou in, I thanemna leh vangsietna te zangin na semzaw hi- **Charles Colson**

Occasional Day

INTERNATIONAL CHILDREN DAY

By K. Milun Zou

Thumapui: Tukum 2024 a ding in "International Children Day khu 2nd June, Sunday" ni toh ahing kitua kha hi. Mite bang in siem sih nanleng zong a Tangmi mawltah in sutkhawm vai chin ka hing kisah a, sutkhiel sutval aup leh Pasian leh simtu zousie in na hing theisiem ding un ka hing ngen masa hi.

**Background and origin:**

Leitung pumpi a Tate Ni (Children Day) kizat na Ni (date) ahun akibang suo sih hi. International Children Day khu 1st Sunday of June in akizang a, Universal Childrens Day ahileh 20th November in akichiemte hi. Gam khat leh gam khat zatna Ni (date) kibang kimlou hi. Leitung a "International Children Day" kizatna masapen gam ahileh Turkey ahia, Kum 1920 in ana zang panta uhi. Amau ban ah Switzerland gam in 1922 in ana zang uhi. Children Day zatna

dia lunggel (idea) hing pokhe masa pen khu V. K. Krishna Menon ahia, ama lunggel khu United Nation General Assembly ah 1954 in akipolut a, 1959 in tam Children Day ni khu October ha in ana kizang a, tuana kipat in 20th November in ahing kiheng (change) kia hi.

Children Day toh kisai bulsut ding hilei, Kum Zabi 20th a "Global Movement for Child Right and Welfare" akipan hi ding ahi. Leitung a Children Day zatdia ana kiphuon khietna (declaration) ahileh United

Na guollelnate a keng (wheel) thuo inlen, guolzawlna lampi ah taipi in- Dr. Jack Hyles.

Nation General Assembly in 1954 ahia, amauten a etzuidan uh ahileh, "Leitung pumpi a Kipumkhatna (unity) apoimaw dan ana tangkou (awareness) nasas khu leitung pumpi a naupangte bitna ding, dopsang na ding, leh ahinkhuo uh manphatah a azat theina ding uh" tupna toh abawl uh ahi. 20th November khu official tah a ni ding (date) telkhiet ahia, tam ni theizing na din, "declaration for the Right of the Child's in 1959 and Convention on the Right of the Child' in 1989" apansan uhi.

India gam ah Pandit Jawahal Nehru pienni khu 14th November, 1889 ahia, ama pienni khu Children Day in India gam ah akizang hi. India gam a naupang ten ama khu "Chacha Nehru" chin ahan uhi. Aman Naupangte leh I gam maban ding khuolna toh a itna zal in naupangte itna thu ana tangkoupi hi. Tua zieh in ama pienni khu India gam in Children Day in akizang hi. Akizatni masapen kum ahileh 1964 ahi. Tam hun (Children Day) chieng in, "Sangnaupangte nasep tuomtuom (various

activities): Lasa, Laam, Tangmi gel, Limgel (painting), Khutsiem silbawl (art and crafts) leh adang dang ah pangding in hanthawwna hun in akizang a, tualeh tam Ni chieng in naupangte ahinkhuo ua akiphana ni" hisah ding tupna top vaiguon ana kisiem hi.

Tualeh Ram Narayan Chaudhary in Neru khu 1958 in interview aban bawlina ah, India maban ding khu naupangte tung a kingah ahidan dohna ana bawlina ah, Nehru in, "Keima ngaituana ah, tunia naupangte khu zingchia India maban a dingte ahi ua, amauten india khantouna ang tut ding uh ahi" chin adawng hi.

Children Day kizat dan:

Tam Ni chieng in, "Naupang lungsieng (innocent) te venbitnan akizang a, tualeh Naupangte damtheina leh bitna dia humbit ding, a siemzilna uh veng leh pam a apat abitna ding uh" chi ahi. Tami Ni in atup ahileh, "Naupangte Thaneina (right) tangkou ding, leitung a zonna (poverty) suh beina ding, siemzilna lam a atasapna uleh, a damtheina, naupangte nasep

akizatna apat asuotat theina ding ua chouna (challenge)" thu akigen hi.

Tam Ni chieng in, "Naupangte patawina Ni in akizang a," tam vaiguon hun sung in, "Naupangte manphatna, asilbawltheina uleh talent tuomtuom aneite uh mipi muthei din lahkha (show) akibawl a, tuana amaute ma akizang a, tambang a manphatnate uh muolsuo nadin hanthawwna thu kigen in, amaute akipah theitheina ding un, Tondan lakhietna, Ki- apmaina (games) vaiguon tuomtuom" akizatpi hi.

Children's Day manphatna:

Tam Children Day manphatna akisut chieng in Pandit Jawahal Nehru Vision apat ahi, ama vision ahileh, "India maban khu tunia naupangte tung a kingah ahi" chi ahi. Aman apeipi ahileh, "Naupangte thaneina agintatdan in, tua nuapangte thaneina toh siemzilna anei ua, a damtheina ding u'leh naupang hunsung (childhood) azat sung ua akipah na ding uh" chi ahi hi. Tam ni chieng in, "naupangte lah ah numei pasal kal a kidaidanna

aumlou ding, amau hitheina chiet apokhiet ding uh, alunggel uh pichin na ding ua siemzilna uh zatatpi ding" chi ahi hi.

Tami Ni chienga India gam leh leitung in apeipi u'leh atangkoupite uh ahileh,

Naupangte Thaneina dopsang ding (promoting Child Rights)

Naupang hun lawpding (celebrating childhood).

A siemzilna uh dopsang ding (promoting education).

Naupangte kepbitna toh kisai tangkou ding (raising awareness on child welfare).

Ahina uh theisiempi ding (fostering a culture of compassion).

Akhupsitna: Tunia Leitung in Childrens Day azat pen u'khu, "International Childrens Day" ahi. India in "Childrens Day" azatni khu 14th November ahi. India in British Kumpi apat Zalenna (Independent) akimu lai a, India Prime Minister masapen Pandit Jawahalal Nehru Pienni (birthday) khu "Children Day" a kizang hi, azieh ahileh "aman, naupangte hepi in a lungsiet zieh a ama pienni khu India gam

Gitlouna na bawl leh na peinuomna sanga sauzaw ah hing pui van in, na upnuomna sanga sozaw ah hing tuden van in, na peinuom Sangin aman hingpei sah ding hi- Dr. Adrian Roger.

sungah Naupangte Ni" chia kizang ahi hi. Tami nia a kizang Naupangte Ni khu **Hindi** ham in "Bal Diwas" aki chi hi.

Tuni leitung gam tuomtuom ah "Naupangte Ni" chie zat in aum hi. Atangpi in naupangte'n amau Sanginn chiet uah azang uhi. Naupangte kipahpina, patawina leh thuhilna hun a zat ding ahi hi. Tuni pen leitung vai a zat hinanleh hun lemtang a la in, Pasion Thu toh naupangte pat/hil ding ahi dan genlei ka nuom hi. Laisiengthou ah naupangte toh kisai thuhilna tampi mu din a um hi. Pichingte'n Vangam umzie a theisiem theina un Mangpa Jesu'n naupangte ana zang hi. Tuachin naupangte banga kingiem khiette khu Vangam a lienpen ahi ding chin ana gen hi.

Children Day chienga Bible sim dingte ahileh:

Naupang apei na ding lampi ah chil in, a up[at dongin zong tuate a kipat in a pielmang sih ding hi (Thup. 22:6),

Na tate uh, phatuom ngai tahin na zilsah ding ua, na inn sung ana tou chieng bang in, lampi a na pei Chieng bang in, na lup

chieng bang in, tualeh na thaw chieng in zong nah il zel ding ahi (Danp. 6: 7-9).

Naupangte aw, Mangpa ah nanu leh napate uh thu mang un, tami sildih ahi. "Nanu leh napa zatat in" tua khu thupieh chiem nei masa pen ahi. "Tuachi'n nou a ding in ahoi ding a, leitung ah na dawmsawt ding uhi" (Eph. 6: 1-3).

Khrist a guolzawlna hingpe zelpa leh koute zang a mun chin a Ama theine gimnamtui theisahpa Pasion kungah kipah thu umta hen (1Kor. 2: 14).

Ngaivawi tate khu Mangpa apat a igoutan uh ahi a, tualeh gil a ga zong a kipahman a ahing pieh ahi (Late 127: 3). Tuazieh in koipou tam naupang neu banga kingai ngiem mi khu Vangam ah a lienpen ding hi (Mt. 18: 4).

Tam mi neute lah a khat zong simmawlou ding in pilvang un, aziehpén a vansawltachte un, van a um ka Pa maisuo a en zing uhi, chi ka hing hil ahi (Mt. 18: 10).

Jesu'n, "Naupangte ka kungah hing peisah un, ama uh khaam sih un, vangam khu tambang mite a ahi" achi hi (Mt. 19: 14, Mk. 10: 14) ❖❖

MISSION COLUMN

MELC MISSION SUNDAY HING PIEN KHIETDAN TOMKIM

By - Rtd. Rev Thangliankham, *Chairman Mission Board Committee*

Mangpa Jesu'n, "Pei unlen Khantanhoi tangkou unlen, agingtate Pa, Tapa leh Hagau Siengthou min in Baptist unlen, thu ka hingpieh zousie hil un" (Mt. 28: 19) na a ahing thupieh bang in Jesu'n Khantanhoi za nailou leh gingtalou Hagau mangthaite lah ah khantanhoi gen a Missionary nna sem ding in Chairel mun a Mission Field Headqrauter ding in apeisa Date 1-7-1991 ni in MELC Director of Ministry (L) Rev P. K. Khama in honkhietna a nei hi. Tuani apatin Khantanhoi genna leh Mission field nasepna alawchin a ahat semna ding ngaisutin skul hon toh thuo in Pasion nasepna Chairel mun ah inei uhi. Tuachin kum phabep isep zaw un gingu ahing ki belep zel a Inn 20/30 lam bang a hing pha tah chiengun leitung khosahna maban ding khuolna in a khente Kakching banga apem ua, akhente Bamond leikai Imphal banga pem in Chairel anuasie zel uhi. Amauten a va pemna munte uah Khristian ahina uh nuasie tuom lou in atudet zing uhi.

Tuabanga Pasion nasepna inei zing laiun Chairel Faith Academy (CFA) apat lai lam a ana khanglien khanglaite akhen BA, B. Sc zou bang aum ua, tuate khu CFA teacher in isem sah zel uhi.

Tuabang a kum phabep ahing hinua in Date 1-7-2016 ni in Chairel Mission Field iphu

khietna uh Kum 25 chinna "Silver Jubilee lawm in Suong iphut ua, Rt. Rev. Dr Hangminthang, Bishop MELC in Suong honna leh latna anei hi", tuami kum in Pawlpi in Chairel Mission Field ichi uh Manipur Mission Field chi in a field min iheng uhi.

Tuabanga Pasion mapuina toh

Khantanhoi puuonzana neilou hattuom khu Mission field ahinalai hi- Alan Richardson.

Chairel pansan a Missionary isep laiun asevel a gingtu kibelap zel in mun tuomtuom ah Fellowship type in kikhawpna nei thei ahing um a, Fellowship inei theina munte khu Pangan Tabi, Leingoubi, Chingkha, Sugnu Meitei Veng, Serou, Kakching lamkai munte ahia, Tentha munpen Church khat inei uhi.

Pasian mapuina toh matal touzel a Pasian gam nna sepna inei zing lai un N. Beren Sing, Chief Minitter (CM) na nuoi ah, Date 3-5-2023 in Singtang mite Meitei ten nasahtah a thangsietna jalin gal ahing bawl khum ua, I biehinne nei sun uh Chairel a Pacca Building leh Tentha a Cacha buildingte leh mun tuomtuom a Fellowship ineina inn te uh ahing haltum sah ua, amaute toh ki chimatna leh kizopna um thei nawntalou in 2023 December apat Manipur Mission Field Mission nasepna kholsan in aum ta a, dahuoi mama hi. I hattuom mite Pasian in akepbitna ding in I thumpi zing ding uhi.

MANIPUR POLAM MISSION

FIELD: Tualeh Pasian in hing mapui tou zel in FLOM te toh partner a Missionary isep khomna ding in UP State sunga Varanasi mun ahing pieh a 2021 vel apatin Varanasi mun ah isem tou zel uhi. Tuamun ah Kum thum (3 years) vel isep zou nua un vangsiet hoi tahin Pasian a ding a ginum gingtu det mama Mrs Bindu Devi in date 3/5/2024 ni in Hindusm biehma hatna state ahina toh Jesu min a Martyr a tha a um in ahing liemsan tahi. "Mangpa India gam a ding ana silguon bang ahiei" chilou ngal gen ding bei bang in a um hi. Dahuoi mama khat ahi. thum zing vai.

MELC phasah dungjuuin Tripura state sunga Pasian hatna suongin Mission nasep lunggulna akinei a, a field mun ding sui ding in Mr Thangpau I doptah chieng in aman Kanchandpur ahing kawhmu a, tuachin Kanchandpur pan san a nasem ding in Tv. Manglianlam khu Rt. Rev Dr S. K. Manlun, Bishop MELC leh Mission Chairman Upa Chinzahau ten date 5/6/2018

Mei a kuon chieng in ahing a sil abawlthei bang in, hattuom in zong Missioanry nna asepna toh ahing giep ding hi- Emil Brunner.

ni in ava koi uhi. Kum 2018 sung Kanchandpur a Tv Manglianlam in ahing sem a, Mission Field min dia lemwaw leh hoi chiin 2019 January ha in Kangrai mun ah isuontou ua, tuana skul ipan ngal uhi. Tuana skul min ding in "Immanuel English Medim Public School" a minvaw in Nu Kimhoiching w/o Luna Damchera a um toh skul ipan uhi. Tualeh Tripura State a Mission nasepna hatsem ding deina in Missionary Manglianlam puile ding leh panpitu ding in Mr Luna h/o Kimhoiching khu Hattuum in Ha tengin Dangka 3000/- (tul thum) akipie hi.

Tuni tannin Tripura State Kangrai pansan a Pasian gam nna isepna uh Pasian tahhatna toh matal tou zel in Dangapara mun leh Colonypara munte ah NMSI te kithuopina jalin Biehin idin theita uhi. Pasian min phatin um taken. Tu-le-tudinmun in Tripura state Mission field a Missionary-3, Tv. Manglianlam, Pitha Ram leh Tv Haugoulalte ahi uhi, tualeh skul a sem sangsye

(teacher) mi 9 inei uhi. Amaute ahi uleh:

- i) P.Dongminthang, Headmaster
- ii) Tv. Nangshok Rai Reang
- iii) Tv. Kaikhogin
- iv) Tv. Thanggoulen
- v) Mrs Laxmita Reang
- vi) Nh. Rongsmi Reang
- i) Nh. Jubilee Reang leh
- ii) Tv. Lamien Joy Reangte ahi uhi.

Tualeh MELC pawlpi sunga kiguol tah a ijah khawm theina ding un 1st Sunday of July khu **Mission Sunday** chia phuonkhiet ahia, MELC Calender ah zong kum teng in akituongsah den tahi. Tami khu MELC in Mission Field masapen Chairel Mission field dia phuonkhietna ni ahiman in, Tualeh tami Ni (Mission Sunday) a toikhawm kimu teng khu MELC Mission Fund ding a bawlpi a submit ding ahi hi.

Tualeh tam banga Missionary nasep thei a hingpui I Pasian min phat kawm in Missionary nasep ihat semna dungun I thum zing ding uhi.

Mangpa Pasian in thupina tang taken. ❖❖

ELWA COLUMN

NUMEI LAMKAI MOHPUOHNA LEH NUNGTHUAP DINGDAN

Nh. Nuamboi, *Women Promoter*

Thumapui: Hunpeisa leh tuhun tanpha in Numeite Gam leh Nam adia vanzah manphatah ana hi zing uhi. **Laigieltu** khat in, "Numei khovel a sil heng lamdangte ahi uhi" ana chi hi. Eden huon ah ana kipan hi. Thuhun Lui hunlai in nungah Esther khu achipite hinna humbittu ana hia, Israelte vaihawmtu zawlnei Deborah zong Israel gam gam muonna tuntu ana hi hi. Nungah Dilila zieh in Philistine ten a melma uh Samson hingmat jou uhi. Scot nungah Mary Slessor in Africa a mihingsanete lah ah kemtu ding neilou taga gentheite humbittu in pang a, Mother Teresa genthei tahgate leh tuomkoi a um Phahte (leprosy) hinna humbittu, khovel pumpi theipha leh it ana loh hi. Numei manpha leh poimaw tahtah gam leh nam, khotang adia ana kizang bei Pandita Ramabhai, Nightingle, India Gandhi chite leh adang dangte hinkhuo i etchieng in gam leh nam ittu amipite adia panla tampi um hi, tua thamlou in tuhun igm buoina ah zong Numei bangzat ahiei te hinna tan leh bwlsietnate zong i thuo zing uhi.

Numei lamkai mohpuohna tamlou i ensuh ding uhi.

1. Nna khat poupou a mohpuona pieh a ium Chieng a, thanuom tah leh ahoi theipen ding apanla a kukalna leh chitahna toh sepding ahi. adieh a Nuten Pasion hattuom kepna

a i mohpuohna ngaisah tah a sepding ahi. aziehpén a khatna ahi:

a) Hattuom neitu Pasion ahidan thei gige dih (Nasp. 20: 23). Lamkaitu in anasepén Pasion nna ahi chi theiin, Pasion minthupina leh agam

Hundamna thu agen zing mite lungtang sungah bang chilaipouin hagau ni atum ngaisih dng hi- H. W. Bucherin.

keletna ding tualeh Hagau mangthai lainatna toh Jesu sepban sem kahi chia theitawp asuoh ding ahi (Kol. 1: 24).

b) Lamkaitu in a hattuom ama a bang a ngaitua a, ama minphat na ding, hamphat na ding, minhoi na ding, nopsah na ding leh tanau, beh-le-phungte adia hamphatna lametna a aseplou ding ahi. bangchi'n Pasian ka nasep ah alungkim diei chi agel zoh ding ahi.

c) Lamkaitu pen enkawltu (steward) adia Pasian seh ahi (Mt. 25: 14-30). Phutlui hilou a, mimal deitelna a Pasian guotna sang a, Pasian deidan leh hoisahdan a kemdia mohpuoh ding a guot ihi.

d) Lamkaitu in Pasian tup-le-ngim hattuom bit, chidam, piching a khang leh ga suoh a, Hagau mangthaite Jesu kengbul a tunsah khu tup-le-ngim a anei ding ahi (2Pet. 3: 9).

e) Mimal chit leh chitlou paulap thei ahi sih (Jer. 1: 6-7, Pot. 4: 10). Lamkai khat mipiten lungkituo tah a ateel, na hina hing theichientu Pasian in tam mohpuohna angpie ahi chieng

in niel guol hinonlou hi (1Kor. 1: 26-30). Pasian ma ah, apil asiem/ apillou, asiemlou, ahau/ azawng, alien/ aneu kibang ahi. mihing pilna, hatna leh lemgelsiemna a sepkhiet ding hilou a, Pasian silbawltheina masuan a sep ding ahizaw hi (Ezek. 4: 6).

f) Ngap leh ngaplou, ut leh utlou paulap thei hilou. **La phuo**tu in, "I ut leh nainou hi a, ut sih lei gamlapi" ana chi hi. Hun awl nei leh neilou paulap thei hilou, I ut nalam ahi leh hun awl bawldan kisiem taluahi (Eph. 5: 16).

g) Pasian deidan a mohpuohna sepkhiet na ding in lamkai khatin Khrist itna masuon a sep ding ahi (2Kor. 5: 14-15).

h) Mihing itna in phatawp nei, Nu itna athupipen nasan in it zoh lou hun nei. Khrist itna in sawlkhe teitei hi (2Kor. 5: 14-15).

i) Lamkaite pen mohpotu hinanleh athu neipen hi tuomlou uhi (Mt. 20: 25-28, 1Pet. 5: 23). Pharisaiten itna dan hilou in, thuneina dan (law) in lamkai uhi (Luk 11: 46). ❖❖



LYF COLUMN

NAUPANG SUNDAY SCHOOL TOH KISAI EN THA VAI

- Pastor M. Thangboi Zou

Thumapui: Kum kim ah i diing manta ua, vaigei nailou ahiman in; Nu leh pate leh Sunday school Sangsyeten a theidia kilawm tamlou Naupang Sunday School toh kisai a nuoi ah en khawm vai ei.

Nipi Sang Ngaikho dan (*Crucial of Sunday School*): Hebrew leh Greek ham zangten ana ngai sang dan uh en masa vai: Hebrew (OT) ham in "**Shema**" ahia, aget nuompian ahileh, "*Guntuh tah a Pasion thu hilding*" china ahi (Deut. 6:49). Tami khu Thuhun Lui hunlai in Synagogoue ah a hing kipan khie ahi. Tami ahileh Jewste Thuhilpa "Syepa" (Rabbi) chia kigente nasep ahi, Sudduccess leh Pharesses ten zong Mangpa Jesu khu Rabbi chin ana han uhi. Synagogoue chi ei ham in gen ding hitalei "*Kisuh khawmna mun*" chi ding ahi. Tami khu Jewste Babylon gam a puimang a aum masang

ua, Pasion thu kihil nading mun Bieh-inn ana neilou zieh un Synagogue ahing siem khiet uh ahi. Tam Synagogue mun a kihilna thum aneite uh hichia khen thei in a um hi:

- a) Kum 5-10 kikal naupangten Jewste tondan leh tangmite (cultural & history) khu kihilnan ana zang uhi.
- b) Kum 10-15 kikalte khu Laigiel theilou (unwritten) Jewste khu Tondan khandan (Tradidtion) kihilnan azang uhi. Tuachin naupang khat theiding a lomte thu dong un adawn thei chieng un mi pichingte lah ahing pang thei pan uhi.
- c) Mi piching gelthei leh

Silhoi bawlin, na shi sih ding hi-Moroccon Thupil.

Sum ichipen suoh (slave) hoi ahia, hinanleh Pu gilou zong ahi- Franch Thupil.

agenthei (read & write) zousie leh thu Pasion thutah kihil un, tualeh Guolnei hemte thuhilna apat akiveng dingdan uh zong kihilna anei uhi. Greek (NT) khang akipat chilin Jesu'n amatah in thu ana hil a, Jesu khu Lamkaipu/ Syepa (Rabi) chin ana han uhi, khuchin nuazuite khang zouin hunsawt tah Pasion thu kihilnan ana zang uhi.

Naupang S/Skul apoimaw dan
(Importance of Sunday school):

Naupangte lah a Nipi Sang (Sunday school) apoimaw na zieh tamlou anuoi ah igen diing uhi:

a) Mangpa Jesu'n, "*Tam mi neute lah a khat zong amanthai ding van a Ka Pa deilam ahi sih hi*" chin (Mathiu 18: 14) agen hi.

b) Naupangte khu Mangpa Jesu Khrist kung a puitheina hun lemtang pen ahi zieh in. "*Naupang apeina ding lampi ah chil in, a upat dongin zong tuate akipan in apielmang sih ding hi*" chin (Paunate 22: 6) agen hi.

c) Tunia naupang na zilsate, zing chieng a imizat diingte uh ahiman in naupang Nipi Sang apoimaw mama hi.

d) Tunia Nipi Sang naupangte zing chieng a gam-le-nam,

hattuom lamkai diingte hing hi ding ahiman un apoimaw hi.

e) Zilsahna dihluo atamta man in naupangte zong apilvan uh ngai in, Nipi Sang i kizilsa theina umsun ahiman in apoimaw mama hi.

f) Nipi Sang hoitah a neite hattuom hatsah ahiman in apoimaw mama hi.

g) Biehinn a i thugen tampite naupangte dia sangseng leh batpha hamsa ahi zieh in, Innkuon tampite ah Pasion thu akizilsahna nei theilou ki-um ahiman in apoimaw hi.

h) Siamzilna Sang inn te (school) ah Pasion thu toh kisai subject kiguong nanleh, tuate bou Pasion thu zilsahna diing a hun khawplou ahiman in apoimaw hi.

S/Skul tup-le-ngim (Sunday School Aim and Object):

Nipi Sang in atop-le-ngim thupipen/ bulpipen ahileh naupangten Pasion athei ua amu diing un, Mangpa Jesu Khrist Mang leh a humdampa ua asan theina diingun hanchiem diing chilei amaute hinkhuo a Pasion zatat a Khristian a hingsuo theina diing uh deina bulpi pen ahi hi.

Tup-le-ngim kingahna:

Tup tangtun theina diing in tup-le-ngim in kingahna mumal hoitah anei diing ahi, bulpi nei zilsahna ahi diing ahi. Zilsahnan atup kipatna leh tup kiingahna ni aum thei hi, tuate ahileh:

a) Pasian Thu (*Word of God*):

Khristian zilsahna in atup leh akingahna bulpi pen Laisiengthou ahi a, tua laisiengthou pen zilsahtu'n (teacher) hoitah asui a agenpen kichien tah a athei chet masat diing ahi hi. Tua theinapen zilsahtu (Teachers) diing in alou theilou ahi a, ziltute (Students) neisah diingin zilsahtu'n amama in a hinkhuo ah aneite zilsa a, miten ahinpi thei diingmi apoimaw hi. Sangsyeten amau hinkhu leh Pasian Thu akipan azilsah diing uh ahidan akithei chien diing uh ahi hi.

a) Sangsyete (*Teachers*):

Zilsahtu (teacher) in sang naupangte poimaw/ kitahsapte amuthei na diing ua hil diing ahi hi. Sang naupangte mi tuom chiet, lungsim kibanglou, dinmun kibanglou, hina

tuomtuom/ kikimlou nei ahi ziehun sangsyeten adinmun, ahina u'leh apoimawte uh hoitah theichien azilsah diing uh ahi hi.

Nipi Sang in adei Chi 5te:

- a) Naupangte'n Mangpa Jesu Khrist nei in Pasian toh akituoh/ kimu theina diing ua ahinkhuo uh siemphat sah diing,
- b) Naupangte'n ahinkhuo uh hoita ahing Khan tou theina diing leh mi dangte a it theina diing uh,
- c) Naupangte'n Laisiengthou deina banga ahing khantou theina diing uleh mipiching ahingsuo theina diing un,
- d) Naupangte hattuum sunga mi muonhuoi ahing hi ua ahing khantou theina diing un,
- e) Naupangte'n amau pumpi/ tahsa mama kem siengthou in khantouna dihtah toh ahing khantou theina diing uh, tambang teng khu Sanginn in adeite ahi hi.

Akhupsitna: Sangnaupang ten athei siem ua ahinpi theina ding u'leh, kilawptah a hiltai Sangsyete hithei chiet ding in Sangsyete zousie Pasian in hing guolzawl chiet taken. ❖❖

Leitung khat maimai inei ua, tam inei sun veuvou u'khu i suhnieh ua i suhsiet u'leh khovel dang inei non sih uhi- Arch-Bishop Desmond Tutu



VONDEI SAULIIM COLUMN

VONDEI SAULIIM TANCHIN TOMKIM:

Thei masat ding: Kum tampi Hattuom in Taga kepna inei uh “**Vondei Sauliim**” local chin leh mimal kiphall mi bangzat ahiei ten ina chawm zing uh a Tangmi (History) thei nailou zong um ding ahiman un, a Tangmi toh kisai, **Mother Nuamzavung** in ana gel “*ELWA HQTR. Celebrating 60 Year DAIMOND JUBILEE, Souvenir, pages Nos. 32-29 sung a VONDEI SAULIIM TANCHIN TOMKIM*” a pat ka hing lasawn ahia, geldia kilawm gelkhalou aup leh kingaidam vai in, full a simnuom ten Souvenir ah sim thei ding ahi, chi ka hing jasah hi.

“**Vondei Sauliim**” ahieleh ELWA HQTR Annual Session 47 veina leh 4th Council Simveng MELC mun a “*Taga kepna inn*” (*Orphanage Home*) a nei dia Thupuosah No. 7 Date 13th December, 2006 nei din lem anasa uhi. Tam khu Kum Thum sung (3 years plan) a nei dia lemsah ahia, tualeh Home kipat san nadia sum sui dingdan ELWA 1st Standing Committee Thupuosah No. 3 Date 20th March 2007 nan tukum (2007) apat in ELWA Pumpi a Sumna apat 5% Home fund adia koi ding chi lemsahna akinei hi. Tualeh Home sepsuana ding in ELWA pumpi in Kum Khat (1 year) sung Ann-ngawl thumna 6vei chiet nei ding chin ELWA O/B Committee Thupuosah No. 6 date 29th September, 2008 thupuon aki bawl hi. ELWA O/B Committee Thupuosah No. 9 date 8th June 2009 na dungjuuin Orphanage Sum apat in Pa Khamminthang tapa..... of S. Sehken leh (L) T.K. Mang tapa.... (amin uh kigellou) panpina ana kipie hi. VDS toh kisai a kipat sahna dia mi kiphall mimal mi 18 apat in Dangka 6, 240/- leh Puonlaisan-1kaikhawm in aum hi.

Home hawwna: Pasion lemsahpi na toh **Date 14th November 2009** ni khu Pu Jawaharlal Nehru pienni “*Childrens’ Day*” ahi toh kiton in **Pi Mannuamching MCS** in “**Vondei Sauliim**” honkhietna anei a, Rt. Rev Dr. Ginkhanmung Bishop in Thumna toh Pasion kungah apkhetna (dedication) abawl hi. Tam Home hawwna vaiguon hun sunga Guest a kichielte ahi uleh:

.....

*Mizong khat kungah Nga Half Kg man ding sum pieh Sangin, Nga mat dingdan hil lei, ama-le-ama akitoudel ding hi- **Unknown.***

Pi Mannuamching MCS, *Chief Guest.*

Tv Thongkhanlal, *Asst. Commandant CRPF* leh

Tv Ngliahau, *Asst. Commandant BSF* te ahi uhi.

Pasian mapuina toh Hawnkhieth ahina toh kitua in ELWA O/B Committee Thupuasah No. 1 date 9th July, 2009 na lemsahpi bang in **Care Taker** ding in **Nh. Siandeiniang** te Nuta akila hi. Tualeh VDS Managing Board masa pen dia guot a umte ahi u'leh (ELWA O/B Committee Thupuasah No. 2 date 9th July 2009):

Director : Rev S. K. Manlun DM/ MELC

Chairman : Upa Thongzaduo

Secretary : Nu Moiniang, Gen/ Secy. ELWA HQTR.

Finance : Nu Nuamzavung, Chairperson ELWA HQTR

Tualeh Naupangten damlou hitan atua hun Chieng ua apoimaw bang a Managing Boardte toh kithuja theidia Doctor's mi-3 zong chiel thei zing din ana kihoupi uhi. Amaute ahi uleh:

Dr Nengkhogin @ Hegin (P. Hegin Lhungdim).

Dr Jamthianlal

Dr Singkhozam

MELC huong sunga um Local chin leh Mi kiphah bangja ahieite zieh in, Pasian panpina toh tulaitah in Vondei Sauliim ah Naupang, **Pasal mi 12 Numei mi 9** agawm in (total) **mi 21** aum uhi. Akipat chil akipat tunitan in **Cl-X zou mi 7 leh Cl-XII zou mi 1** aum a, **agawm in mi-8** apha uhi. Tualeh tulaitah a **Warden** ahileh **Nu Chiindeikim w/o Pa P. Zamminlun te Nupa** in a etkawh ahi hi.

The 4th Valediction Day Vondei Sauliim: Apeisa Nisim 6th June, 2024, nai 3:00Pm in Martin Luther Hall ah, ELWA GHQ etkawhna nuoi a um "Miss Ngailianggaih" in Cl-X, Manipur Board, 2024 azaw toh kiton in Hakhietna vaiguon zat ahi. Tuanah Vaiguon tangpi ahileh:

Vaidawn thugenna: Nh. Nuamboi, Women Promoter

Blessing Prayer: Rt. Rev. Khup Do Khen, Bishop, MELC

Hawthan Thugenna: Rev Kamminthang DM/ MELC

Nuomthu genna: Nu Mawite, V/Chairperson VDS

Topna & Singpi latna: Rev. Suonboi Tungdim, Chairman, VDS ahizaw in, Lawchinna kipahpina in Niangtui dawn khawmna nei in hun zaw ahi hi.



.....
Mani thangpina zoutu in melma zauhuoipen a zou hi- Publicius Syrus.

MELC INNSUNG THU

1. BISHOP IN MUN NI AH BIEHINN HONNA KHAT LALUTNA ANEI HI:

Apeisa Nisimh 22/5/2024 (Wednesday) zinglam Nai 10:00 in "National Missionary Society of India" (NMSI) panla na toh "Sathiyadhas Memorial Good Shepherd Church", sponsor na kilam T. Daijang MELC biehhin hawwna Rt. Rev Khup Do Khen, Bishop MELC in anei hi. Vaiguon tangpi ahileh:

- a) Rev Nengkhanlal Milun DS/ LED in Vaidawn thugenna nei in.
- b) Pasion thu hing Rev Ph.D Henry Jeba Richard Gen. Secy. NMSI genna hun azang a,
- c) Thugenna Rev. Dr. R.Prince Vethamanickam, President Law Memorial CSI District Church, Kadamalaikuntu
- d) Mr. S.Jeyadhas & Family, AGS South Tamil Region & Secy. NMSI Marthandam Area Committee nei uhi.



Tualeh Biehhin lamna toh kisai Pa Tuzamang, Construction Incharge in gen a, Nuamthu genna Upa S.Zamzalam, Moderator MELC nei in, Rev Suanboi Tungdim, DM/ MELC in guolzawlina toh Vaiguon khahna nei hi. Vaiguon hun sungin Nh. Elizabeth Niangneihoi, Zomi Colony in Pasion phatna la sa hi. Vaiguon zawin peikhawm teng toh Niangtui dawwna anei uhi.

Apeisa Nisimh 24/5/2024 in MELC Zumpi akipat Lamka nusie in Colony Para, Tripura Mission Fiel a Biehhin "National Missionary Society of India" (NMSI) sponsor hawwna leh Upa teelna nei ding in kuonkhie uhi. Amaute ahileh:

- i) Rt. Rev Khup Do Khen, Bishop MELC
- ii) Rev Kamminthang, Director of Missions and Evangelism, MELC
- iii) Retd. Rev Thangliankham, Chairman Mission Department MELC
- iv) Pa Thanglianpau, Dirver MELC



Upa teelna saitui ding in Retd. Rev Thangliankham leh Upa Daharam Reang guot ahi uhi. Tualeh NMSI Zumpi akipat in mi-3 hing pei uhi. Biehhin hawwna vaiguon tangpi ahileh:

- i) **Minister:** Rev Dr Ph. D Henry Jeba Richar, Gen. Secy. NMSI
- ii) **Conductor:** Haugoulal, Missionary, Dangapar, Tripura
- iii) **Opening Prayer:** Upa Daharam Reang, Kanggrai Tripura
- iv) **Short Speech:**
 - a) Rt. Rev Dr George Stephen, President NMSI

Kigensietna ah, guttatna bang in ana dawng sawntu pen guta banga khiei a ngai ahi- Lord Chesterfield.

- b) Rt. Rev Khup Do Khen, Bishop MELC
- c) Rev G. Jaganathan, Org. Secy. Kanyakumari
- d) Mr Manglianlam, Field Incharge, Tripura
- v) **Words of Thanks:** Rev Kamminthang, Director of Missions and Evangelism, MELC Kikhawp hun sungin, ELWA, Kanggrai leh TELC Dangapara, apat lamna (Choreography) aum uhi.

KHENGJANGLHANG VILLAGE MELC DIA PHUONKHJETNA NEI:



Apeisa 9th June, 2024 ni in, Rt. Rev Khup Do Khen, Bishop in, Thanlon Division sung a Hattuum khat hi ding in “Khengjanglhang Village” khu MELC a ding in “Phuonkhietna leh Lalutna” nei hi. Vaiguon tangpite ahileh:

- a) Rev Kapsuonkhup DS/TL in Vaidawn thugenna hun zang hi.
- b) Rev Kamminthang DM/MELC in Pasian thutah genna hun azang a,
- c) Vaiguon Khanna leh Annkuong thumna Upa

Lianzakhai, N. Leitan in nei in, houlim khawmna “MELC Zumpi in makai in Division leh Khengjanglhang khomite toh” nuomtah a nei in vaiguon zaw ahi tahi.

Tualeh tam ni mama in Khengjanglhang khomi Inn 6 ah Panpina zong akhawm hi, tua Panpina kihawmte ahileh: (i) Noodles (ii) Soya Chunk (iii) Mustard Oil (iv) Salt (v) Turmeric power (vi) Chili power (vii) Bathing Soap (viii) Washing Soap (ix) Handwash (x) Antiseptic Liquid (xi) Sanitary Napkin (xii) Stainless steel Rice Plate (xiii) Stainless steel Glass (xiv) stainless steel curry bowl (xv) Mosquito Net (xvi) Bed sheed (double), (xvii) Sleeping mat (xviii) Woolen Blanket, Total Item 17 akhawm khia hi.

2. MELC THEOLGIANTE TOH KIPAWLKHAWMNA HUN ZANGKHAWM



Apeisa Nisimh 20th May (Seppatni) Nai 11: 30Am in Bishop Pindan (chamber) ah, tulaitah a MELC in Theologians ineite uh toh MELC Zumpi in “Kipawlkhawmna hun” (Director’s Tea) azang khawm ua, tuanah Rev Suanboi Tungdim DM/MELC in Key note address hun azang a, Upa S.

Zamkhanpau, Chairman Project & Development in Houlimna hun azang hi. Rt. Rev Khup Do Khen, Bishop in Theologiante Hasawt thugenna leh guolzawl thumsahna hun azang hi. Tualeh Theologiante (Bible students) apat houlimna nei jou un, Rev Kamminthang DME/MELC in tawpna leh Niangtui latna nei in hun khah ahi hi.

Tulaitah a MELC Huongsung a i theologian (Bible Students) te uh Min, Khuo, College leh a Degree zilte uh ahileh;

*Tanchin bu khu gam-el-nam, hattuum leh khotang limlangh (mirror) ahi-
Unknown.*

- i) Mr Johnson Tungdim s/o Rev Suanboi Tungdim of Zomi Colony in, "Gugukul Lutheran Theological College & Research Institute" (GLTC & RI), Chennai mun ah Master of Theology (M. Th) a zil hi.
- ii) Mr M. Thangsuanlian Joseph s/o (L) Lunkhogin of Central Church, Tuibuang in "Evangelical College of Theology" (ECT) ah Master of Divinity (M. Div), Nehru Mark a zil hi.
- iii) Mr Mangkhanpau s/o Upa Tunzagin of Central Church, Tuibuang in "Grace Bible Colleg (GBC) ah Master of Divinity (M. Div), New Lamka a zil hi.
- iv) Miss Lucy Manhoiniang d/o Retd. Rev Thangliankham of Bethel Chapel Hiangzou in, "Grace Bible College" (GBC) ah Master of Divinity (M. Div), New Lamka a zil hi.
- v) Mr Christopher Zamlunlal s/o Ginzathang of Zomi Colony in, "Troclock Theological Seminary" (TTS) ah, Bachelor of Divinity (B. D), Imphal a zil hi.
- vi) Mr Hauminlal s/o (L) Thangkhanlian of Singngat in, "Troclock Theological Seminary" (TTS) ah, Bachelor of Divinity (B. D), Imphal a zil hi.
- vii) Mr Ginneithang s/o Khupzalam of Zabellei in, "Asia Baptist Biblical College" (ABBC) ah Bachelor of Divinity (B. D), Rengkai Bible Hill a zil hi.
- viii) Mr Hauminlian s/o S Khaikhankhup of Janguam in "Asia Baptist Biblical College" (ABBC) ah Bachelor of Theology (B. Th), Rengkai Bible Hill a zil hi.

Lawchingtah leh chidam tah a ahing Graduate thei chietna dingun hattuom miten i thmumna uah theichiet/lanchiet vai.

3. LWSIT IN PAMPINA HAWMNA:

Apeisa Nisimh 21/5/2024: Lutheran World Service India Trust (LWSIT) Kolkata leh MELC Relief Committee pangkhawm in gamsung buoina zieh a galtaite kungah pampina hawmna kinei hi. Innkuon 397 ten pampina amu ua, amute uh ahileh:

- (i) Rice 10 Kg (per family) leh (ii) Dal 1 Kg (per family). Tam pampina mute ahileh:
 - a) Youth Hostel, Relief Camp
 - b) Zoumunnuam, Relief Camp
 - c) Bijangloubu, Relief Camp
 - d) Awnkap Veng, Relief Camp, tualeh Lamka East & West apat Khuo 16 te ahi uhi.



4. SLC IN SILPHA BAWL:

Shillong Lutheran Church (SLC), neiman hilou in, Pasion gam nasepna amasawn semsem ding tup-le-ngim a nei in Tripura Mission Field azat ding in "Reang Ham in Holy Bible copies 50" Sponsor ana bawl uhi, tam Bible te khu Colonypara Biehinn Hawnni chienga hawmza ding ahi hi. Tam banga silhoi bawl SLC Member zousie Pasion in tam sanga hoizaw leh thupizaw semkhe jou zing din guolzawl taken, chi ithumna uh ahi hi.

5. LUNG DAM THUGENNA:

Pa Khaalpu s/o Upa Mangkhanmung (SLC) in Central Force a sepna amuna tung ah akipahna suhlatna ding in Colonypara, Tripura Mission Field a zat ding "Pulpit Khat" donate abawlna tung ah MELC Mission Department in tam Tangkou zangin Lungdamthu

Na melma hinapia lawm (friend) a na bawl kha ding pilvang in- Seneca.

ahing kiphuong hi. Pasion in asejna leh abawlna lam zousie ah guolzawl zing taken, chi i thumna uh ahi hi.

6. SEMINAR NEI UH:



Apeisa Nisimh 25th May ni'n Lamka West Division sunga um Lutheran Youth Fellowship in "One Day Seminar-cum-Fellowship" Immanuel Khopi MELC biehinn ah nei ahi, Seminar Thupi ding in, "Changing the way you think" pansan in anei uhi. Tami Vaiguon ahileh Rev Dr S. K. Manlun DS, Lamka West in thumna toh ahawanna anei hi. Resource person & Topic te ahileh:

- Career Guidance:** Smt. Mannuamching IAS, Special Secretary, Govt. of Manipur.
- Preparation for Competitive Examination:** Shri Hauminthang, Assistance Audit Officer, Principle Accountant General (Audit) Manipur.
- Increase in prevalence of Anxiety & Depression among the youth:** Shri Suanlian Tungnung, Master of Social Work (MSW) in Mental Health.

Tv. Thangchingmang, V/Chairman LYF in Nuomthugenna anei jou in, Rev Ph. Nangkhanlal, Biel Pastor in thumna toh seminar khahna nei hi.

7. ANN-NGAWL THUMNA NEI UH:



Apeisa Nisimh 25th May ni'n Sangaikot Division ELWA saina toh D. Jangnom MELC mun ah "Ann-ngawl Thumna" anei uhi. Tam Vaiguon khu Nu Chingngaihat, Treasurer in puitu in apang a, Tualeh session 3 in khen in aum a, session chin a thumna puitu te ahileh:

- Rev Kamsuanlal, DS, Sangaikot Division.
- Pro Pastor Joshua Mangsuankhai, Biel Pastor
- Evan. Thangneute ahi uhi.

Nu Hoinu, Jt. Secretary ELWA in nuomthugenna anei jou in, Tawpna leh Singpi latna Local Chairman in thumna toh akhh hi.

8. BLOOD DONATION BAWL:



Apeisa Nisimh 4th May ni in "LYF, LED" ten District Hopsital ah "Give Blood Save Life" chi thupi pansan in Mi-29 ten "athawn in Sisan piehna" nei uhi. Tamna Rev Nengkhanlal DS/LED in "Sisan pieh ajauhuoi loudan tomkim a gen in Thumna nei in sisan pia kipan hi", sisan pieh apang ngal uhi.

Lawsapna tuntu khu theine leh hatna tasap zieh hilou in, tupna leh piehna tasap zieh ahizaw hi- Vince Lambardi.

9. BISHOP TOUR:

Apeisa Nisimh 15/6/2024 ni in Rev Chandran Paul Martin chielna bang in Bishop pu leh Project Manager pu Upa S. Zamkhanpau, Gwahati, Shillong te ah vazin uhi. Tualeh Nisimh 18/6 ni in Shiloong mun ah Martin Luther Christian University Faculty te toh houlim khawmna anei zaw un, innlam ah a hing kile kia ta uhi.



10. RELIEF SECOND PHASE HAWMNA KINEI:

Apeisa Date 19/6 ni'n A Project of MELC- ELCA Lutheran Disaster Response saina nuoi ah, MELC Zumpi ah Nitalam Nai 1:00 in, Relief Second Phase Van (metarila) hawmna Viaguon hun akizang a, tamna Guest te ahi uleh:



- a) Smt. Mannuamching, IAS, Special Secretary, Govt. of Manipur District Nodal Officer, (Relief Camp) Churachandpur.
- b) Rev. Chandran Paul Martin, The Representative Asia and the Pacific, ELCA leh
- c) The Rt. Rev. Khup Do Khen, Bishop MELC pang uhi.

Tam vaiguon khu Rev. Kamminthang D/Mission in hunkem hina la in, Rev Suanboi Tungdim, D/Ministries in Hunpat thumna anei a, Vaidawn thugenna Upa S. Zamzalam, Moderator MELC in azang hi, tuajou in Upa S. Zamkhanpau, Secretary Project Management Committee, MELC in Project toh kisai Pulahna hun azat zaw in Upa GL Tungnung, Chairman, Relief Committee in nuomthu genna leh hunkha thumna nei in, Smt. Mannuamching, IAS in Flag Off abawl zaw in, Relief tangdia lawm teng kungah hawmkhietna akipan ngal hi.

11. SUUNNA VAIGUON KIZANG:

Apeisa date 3/5/2024 ni in, gingloute khut ah i Missionarypi uh Nu (L) Bindu Devi w/o Pa Vinod Kumar of Varanasi, UP in Jesu min a Martyr in ahing beisanna tung ah, MELC Zumpi vaisaina toh Date 1st July, 2024 Nai 11: 30Am in Headquarters Church, Zomi Colony mun a Suunna Vaiguon akizang hi.

Tangkou Editorial Boardten zong i Suunpi thu uh iphuong uhi.



*Gingtute sephawmna leh kipumkhatna khu Khristiante mission poimaw pen ahi- **David J. Bosh.***

If undelivered, please return to
The Editor, Gospel Tangkou
MELC Office, Hqtr Zomi Colony
Post Box – 10, Churachandpur 795128
Manipur, India,
e-mail: melcqrts@mail.com

Gospel Tangkou (Gospel Herald)
RNI Regd No : 62170/95 MNP 76
(Hachin a kisuo, hattuom khanletna ding)

Printed at



Convention Book House
Dorcas Hall Campus, New Lamka

(RNI Regd. No:62170/95 MNP 76)
BOOK POST

To

.....
.....
.....